

KUMVWA, KUTULUKA, NEKWINGIJILA PONKA PA KYAMBO KYA LESA

 Pano, ao matepu, a iye mpwijilo lukeelo luno, kechi akupotesha ne, ke mambotu a Kipwilo nangwa muntu umo, mambo kiji pa Lufunjisho. Kabiji amwa mumbungeno monka, kyalengejile kimvundakanya, mambo atweba bonse babiji kyakatezhe pakwimona meso na meso, bino twafwainwa kwikala na muchima ku muchima, nangwa byonkabyo. Bino kiji, atweba mu tabbanako kuno, ao matepu ke, mumone pa . . . Ke kya balunda, kabiji ne bikwabotu.

² Pano twayai tukunyike mitwe yetu pa kakimye kacheche tulombe. Baanga bakonsha kutemwa kwibavuluka kimye kyo twakunyika mitwe yetu? Nobe byonka byo suntulai maboko enu, ne kwaamba mba, “Nkambo, Amiwa—Amiwa nakabila leelo, kabiji Nakeba lusa Lwenu,” monse mo kyaikela.

³ Taata Wetu Wamwiulu, pano tubena kufwenya ku Jitanda Jenu ja lusa, mambo twaipuzha kikye. Kabiji kyajinga kyabulwa kwi atweba kupichila mu Mwanenu, kabiji ke Mupulushi wetu, amba inge atweba twaipuzha Anweba kintu kiji kyonse monka Mujizhina Janji, kyakonsha kupewa kwi atweba. Onkao mambo, Nkambo, byo twayuka mba tubena kwikala mu bimvule bya Kwiya Kwanji, kabiji pano twaimana mu bimvule bya lusa Lwanji, nanchi twaipuzha, Nkambo, amba Anweba mwakonsha kusala, na Mupashi Wazhila, abyo bintu byo twafwainwa kwipuzha. Kabiji twalangukuka lukeelo luno, amba kechi kyakonsha kwikala kyapusanako na Kyambo Kyenu ne nangwa ku bololoke Bwenu bukatampe ne, kabiji lusa Lwenu ne bupe, kyakuuba mba inge twakonsha kwipuzha mba twafwainwa kwikala na lupempu lwapusanako leelo kufuma ku Mupashi Wazhila. Pakuuba mba Aye wakonsha kwiya mukachi ketu kabiji ne kuyuka milangukuko ya michima yetu, amba tusololwe ku bifulo byetu byanekena, kabiji ne kubuka misongo yetu, ne kukasa michima yalajika, kabiji ne kupulusha balubilamo, kabiji ne kunengezha bantu na Kwiya Kwanji. Nkambo, umvwai yiwe mulombelo.

⁴ Pano tusa kutanga Kyambo Kyenu. Kabiji—kabiji twalomba, Nkambo, amba pa lufunjisho lwetu lwa sukuulu wa pa Mulungu lukeelo luno, amba Anweba musakuleta kishina kya kutanga kabiji ne Kwibisolola ku michima yetu. Mambo, atweba twaiya

kuno nakintu kimo. Akya kintu kimo, bunke bwakyo, ke kuyuka Anweba bulongo. Atweba twi Benakilishitu, konka ku Lwitabilo, twakeba kwimuyuka Anweba bulongo. Abo babula kwikalapo Benakilishitu, babena kukeba kwimuyuka Anweba nobe Mupulushi wabo. Aba bakolwa, babena kukeba kwimuyuka Anweba amba lo Lubuko lwabo. Kabiji twalomba mba kechi kusakwikalapo nangwa umo mu kino kishimikwa usakufumamo, kwakubula kutambula ne, bino amba kila kukabila konse kwikale kwafikizhiwa mwaila nkalata, kabiji kukabila konse kupanwe, kabiji yesne—yense muntu ekale wasangalala, kabiji baya mu kishimikwa, na kwamba, nobe boba bailenga ku Emasa, “Bushe michima yetu kechi yajikutemanga byo Twajikwisambanga nanji pakuya mu jishinda nenyi?” Mambo twaipuzha kikye mu Jizhina ja Yesu. Amena.

⁵ Pano kwi anweba mubena kukeba kuzhikula mu Buuku wenu. Javula, Natana kuuba mba, mu mpwijilo ya busapwishi, amba ponka pamamineti twenti nangwa mamineti saate mukulengela kwenda bulongo kwa mbila yamupashi yakuleta mukupanwa-monka, kabiji nanchi nekwikala nalwito lwakyakusokelapo. Bino awe ke sukuulu wa pa Mulungu, Amiwa kechi nasaka kwi kyuba muyewa musango lukeelo luno ne. Naumvwa kutundaikwa nekubanda bingi kabiji ne kwamba ponka Pakyambo.

⁶ Pano, inge kujipo umo ao wabula kumvwa bulongo, waumvwa mashika saana, kintu kyowafwainwa kuba obe ke... Mulongo wami, kalama wa kipwilo, uji kunyuma ya kipwilo kokwa, suntulaikotu kuboko kwenu *byobya* kunyuma, kwi aye, kabiji aye ukashinda kyuya. Kabiji atweba twakeba mba anweba mwikale bulongo kabiji ne kumvwa bulongo. Kabiji ne kuteleka ku Kyambo, mambo twaketekela Mupashi Wazhila kwitufunjisha Kyambo kya Lesa. Kabiji anweba bonse mwakonsha kung’umvwatu bulongo, kunyuma nyi? Inge mwakonsha, suntulaiko maboko enu, inge anweba—anweba mwakonsha kumvwa bulongo. Akyo kyawama.

⁷ Pano Nasaka namba anweba muzhikule pamo ne amiwa, Njina kibaba kyanembwa papo, kabiji ne Kinembelo kimo. Nanchi Nasaka namba anweba muzhikule pamo ne amiwa, patanshi, mu Buuku wa bena Loma, Loma, kyapitala kya bu 9. Kabiji twakeba kutanga Kinembelo kya lufunjisho, patanshi, mu Loma 9:11.

(Mambo baana kasa bakyangye kusemekwa ne, nangwa kuuba kintu kyawama nangwa kyatama ne, amba kufukula kwa Lesa monka mwaila kusalululwila jimo akwa kwaimana, kechi namambo amingilo ne, bino kana kwa aye mwine waita;)

Kyaambilwe kwi aye amba, Awa mukulumpe ukamwingijila nkasanji.

*Byonka byo kyanembwa, Yakoba Namutemenwe,
kabiji Isao Namushikwa.*

⁸ Aye Lesa a bikepo mapesho Anji pa kiky Kinembelo kyangwa. Kabiji pano kibaba, kyakutundaika lufunjisho lwami, Amiwa nasaka kusenda bibye byambo: *Kumvwa, Kutuluka, Nekwingijila Ponka Pa Kyambo Kya Lesa*. Lekai Amiwa mbwezhepo jibiji. “Kumvwa, kabiji nekutuluka, kabiji nanchi ne kwingijila ponka pa Kyambo kya Lesa.”

⁹ Bino, atweba twayuka bulongo, atweba bantu bapesapesa Binembelo mute ne bufuku, kabiji ne kutanga bipepala byetu nekumvwa nyushi kufuma kubabijika, amba aino ntanda pano yaimena ponka pa bulume bubiji bwaluusa lwabumupashi bukantampe. Kabiji alwe lonse luusa lubiji ke bupopweshi. Kabiji Naketekela mba aa mazhita akatampe abena kwiya ku mutwe. Kabiji alwe lonse luusa lubiji lukatampe lwaimenejileko abo baana babiji bakwa Izaka. Bushe awa Lesa, monka mwaila milangwe yakwa Lesa ibula kupela, yamweka mubyonsetu bintu kwi atweba mubimvule; amba atweba tukonsha kuyuka kupichila mubibye bintu, nakyabukiine, akya kyaikajikilwe kwi atweba. Wikileteletu patoka, kuuba mba Lesa ne Kyambo Kyanji, kabiji bilengwa na lesa ne bya mwiulu Byanji, byabikiwa bingi mu ndonda, kyakuuba mba ne—ne ndengamambo wakonsha kumona kintu kimo kyafwainwa kubiwa. Lesa watanchikile byonkabya. Kafwako nangwa umo wakonsha kwikyuba kwakubula kyakubepelamo.

¹⁰ Pano, twamona mu babo baana babiji kimye kyo, kasa bakyangye kusemwa ne, bajinga pa nkondo umo na mukwabo. Nangwatu bainanji kisungu... Mambo, aye wajinga kisungu, Libeka ao wasongwele lukunwa waoloka wa mu mulaye wakwa Lesa, Izaka; amba abo babiji bajinga bezhijika, Bayuzhiwa-namupashi baitabila bakwa Lesa, baikajikilwe kala kuonka masongola amba abo bakwatankana pamo. Lesa wikiyukijile jimo akya. Kabiji nanchi akya kyokonsheka kwiya byepi akya kintu kupichila ku umo maama, ne mukwabo umo taata? Umo, ke muntu watama bingi; kabiji mukwabo, ke muntu wawama bingi; kabiji ne awa muntu wawama wakonsheshe kutalwa amba watama, kabiji watama atajilwe amba wawama.

¹¹ Pano akyo, kimye kyonse byo kyajinga, kimye kyonse ukekala mutanchi wakwa Lesa. Lesa kechi wakonsha kupimpula mutanchi Wanji ne. Mambo, Aye ulenga mutanchi Wanji walumbuluka, mambo ke lubaji Lwanji.

¹² Mu bujimi bwa Edena, bubi bwajinga bwawama bingi poso byobwakebwile Eva kufuma ku bololoke, ne kuya ku bubi. Kabiji mu bujimi bumu mwajinga kichi kya Bumi, ne apo mwajinga kichi kya lufu.

¹³ Atweba twakonsha kuyuka mba leelo ke muzhilo wakupusenamo. Amba, akwa kuji kyawama, kuji kyatama;

akwa kuji kyalumbuluka, kuji kyatama. Kabiji atweba kechi tukakonsa, nangwatu apa pampuzha pekale byepi, kukonsa kwisunkenya atweba bene kufuma mukyenyi kyabino. Mambo, Paulo waambile mba, “Inge Nakonsa kuuba bulongo, nanchi bubi buji ponka.” Ndengamambo kechi ukasukena kufuma ku Mwinakilishitu ne, Mwinakilishitu kufuma ku ndengamambo ne. Akwa kukekala batumonyo bakyokya kyalumbuluka, kabiji ne lushimuno lwa kyatama, kimye kyonse. Kabiji anwema mwafwainwa kusalapo. Obewa wafwainwa kutola lubaji lumo nangwa lukwabo.

¹⁴ Bino mu babo baana babiji, ke kyenyezi pakuyuka kyokyo, kasa bakyangye kusemwa, bonse babiji lukunwa umo, kufuma kwi Izaka, ao wajinga mulaye. Pano, lufujisho lwetu lwalepako pacheche, kabiji Nakeba kwikala na kintendekesho kyabaya pakuuba mba mwakonsha kumona byo Mbena kwambapo. Kabiji mwaana mutanshi, Isao, ao wasemekelwe; twatana mba kechi abo bajinga nakwikatazhatu kabiji balwilenga amwa monka munda mwabainabo, bino bafumine abo mwi aye, kasa babena kulwa, Isao waishile, ne Yakoba kasa akwachijila ku lubaji lwanji. Kabiji batwajijilatu na kulwa.

¹⁵ Kabiji akya kyajinga byepi, musango mokyamwekejile akya kyalumbuluka, kyatoka, kyalalululwa, kyazhila, kyazhijikiwa ku shanji nangwa inanzi! Nanchi pa kwikikajika, akya, Lesa wita na kusalulula. Kyafwainwa kwikala byonkabyo. Nangwatu bashobe ne bainobe bajinga bawama byepi, byo bajinga bawama, nangwa bainobe ne bashobe bajinga benakilishitu byepi, kikijitu pa muntu umo, ngimeno yobe kumeso akwa Lesa. Alwe lufunjisho lwafunjisha, mba abo, bonse babiji baana, bajinga ne na basalululwa kabiji baitwa kwi Lesa, taata ne maama, mwanamukazhi kisungu ne mwanamulume wazhila, ao kyapelako waishile kupichila monka mulukunwa wanjji mwaishile Yesu Kilishitu. Aye wasemekelwe nobe umo wafuma mubafu. Aye waesekelwe, bashanji kunyuma yanji. Kabiji aye walailwe, kupichila mu yiwe lukunwa wa Izaka, amba ntanda yonse ikapuluka. Kabiji kufuma ku muntu muyewa musango, ne mashi anji atoka bingi kyakuuba mba Lesa kechi wakonsa kuleka Benafilisitiya baiya pe bainanji ne, panyuma Abalahama wamupaine kala kwi aye. Lesa wabikile mwalo pa nzubo yanji, kabiji waambile mba, “Anweba mujitu pamo nobe umo wafwa,” mukukwachijila akya kyakakola kamashi atoka. Kabiji awa Libeka, waoloka, wazhila, watumine-na Lesa kabiji ne maama waitwa-na Lesa. Kabiji kufuma ku yewa lukunwa wazhila kwaishile waluwakana kabiji ne waitabila. Mwamona? Nanchi kiji mwi Lesa na kwita, kusalulula kwa Lesa.

¹⁶ “Kabiji kasa akyangye kusemwa ne, Lesa waambile mba, ‘Yakoba Namutemwa ne kushikwa Isao,’ bonse babiji kasa bakyangye kusemwa ne.” Nanchi twafwainwa kumywa byepi. Muntu umo uji na Lesa waamba kwi obewa kabiji wakwita

kwiya ku tebulu Wanji kabiji ne ku Nzubo Yanji, kabiji ne kwikala mwaana Wanji wamulume nangwa wamukazhi, kechi kujipo kintu kikatampe kya musango yeo ne.

¹⁷ Abo bansongwalume babiji, inge twakonsha kumona musango wabo, umo wa mwiabo wajinga muntu wa bumupashi, awa wajinga Yakoba. Kabiji muntu wa butunshi wajinga Isao. Bino bonse babiji bajinga babupopweshi. Kabiji akya kintu kimo kyatanwa ne mukino kifulo monka munkulo ino, buntushi ne bumupashi.

¹⁸ Isao waimenejileko awa muntu wa panopantanda, kumubiji, wa bupopweshi, bino kechi wakonsheshe ne. Kechi kyajinga mwi aye kya kwikyuba ne. Aye kechi wakonsheshe kwikyuba ne. Aye kechi wakonshe aye kumukajisha kupita abya bintu byamuntanda ne, bintu byabuntushi.

¹⁹ Bino, Yakoba, kyajingatu kyapela bingi aye kwikyuba. Pano, Yakoba, kimo kintu kyajinga ne Yakoba, kabiji akya kyoakabijilenga kimye kyonse ke abwa bubeji, nangwa kyajinga byepi aye mwakwikitambwila, aye wikitambwile akya.

²⁰ Kabiji awa mupashi wakyokya kintu kyakusemwa kyatwajijika mukwimenako muno muntanda leelo jino, kabiji kibena kwiya konka kumutwe pano: waitabila wa bumupashi; kabiji ne muntu wa butunshi, waitabila wa butunshi. Kafwako nangwa umo wakonsha kwamba mba kechi bonse babiji bapopweshi ne. Bajinga. Abo kechi baambile mba umo waingijilenga “nkishi” kabiji mukwabo “Lesa ne.” Bajinga bonse babiji bakalume bakwa Lesa.

²¹ Pano, taiko muchima ku Binembelo pano pa yiwe mutwe, mambo Naketekela mba kyakonsha kwimukwasha. Mwamona? Pano, “Kechi bonse baamba mba, ‘Nkambo, Nkambo’ bakatwelamo ne, poso awa uba kyaswa muchima wa Ba Taata baji Mwiulu.”

²² Pano inge mwamona, Yakoba wajinga na kintu kimo kyo akebelenga, mambo, monka mwayila Kyambo, mapesho kabiji ne—ne kintu kyawama kyabikwa mu bubeji. Kabiji, Yakoba, kyo kyonka kintu kyo ajinga nakyo, kyo kyonka kyo ajinga nakyo mu milanguluko ke “kusenda bubeji.” Kabiji Isao wikisujile. Awa wajinga nakyo, kyasulwa, nangwa mba wajinga na bumvu pa kikye. Bino Yakoba wakebelenga nangwatu kikale byepi, aye wakebelenga.

²³ Abyo byokiji ne na waitabila wa bumupashi leelo. Aye kechi utako muchima nangwa mwakonsha kumuseka byepi aye, nangwatu mwakonsha kumuletela byabisela byepi, nangwatu wakonsha kumweka byakubula maana mwaila ngubilo yamilanguluko yabuntushi. Nkebelo yanjitu ke bubeji. Aye ubena kukeba kufika kwi Lesa, mambo kyasemwa mwi aye. Aye kechi wakonsha kwikikwasha ne.

²⁴ *Yakoba* kulumbulula mba “mujimbijimbi” nangwa mba “mongozhi.” Bino panyuma ya kutana kabiji ne kwiya mu kwibutambula abwa bubeji, aye wapimpwilwe. Akyo ke kya buntunshi, lupimpu. Aye wajinga nanchi waitwa, *Yakoba*, ke “ke mwaana mfumu wa Nkambo,” ao walwile ne Aye.

²⁵ Aye waitabila wabutunshi leelo, “Oo, kikulutu Naya ku kipwilo kabiji sakuuba kintu kiji bulongo, ng’anyi lupusano lujipo?” Ajo ke jibumba ja Isao, aye watwajijika kulenga bisela kabiji ne kusula abwa bubeji, aye kechi watako muchima kukyokyo ne, bino *Yakoba* wikitemwa bingi akya.

²⁶ Kabiji mwanamulume wa bumupashi leelo, ne mwanamukazhi wa bumupashi, abo basalwa, batongwejlwe jimo kwi Lesa kwiya ku Bumi Bwapeenape, inge bafwainwa kupotesha bintu byonse byo baji nabyo, inge abo bakonshe kutola mazhina abo kwiafumya amwa monka mubuuku onse a kipwilo mu kyalo, abo bakitwajijika kukebesha abwa bubeji. Kyo kyonka kintu kiji na lukatazho kwi abo, “ke kutambulatu abwa bubeji,” kyo kyonka. Nangwa kikale byepi, nangwa akya kipimo kyabo kikale byepi byokyafwainwa kwiya, inge abo bakonshe kwiya kukyokusokelapo kabiji ne kujila, boo-hoo, inge abo bakonshe kunyemena kupita amwa—amwa monka mubifulo kabiji ne kubwela kabiji ne kulenga bintu buloongo, ne kupotesha byonse byo baji nabyo, nangwa—nangwa kupana byonse byo baji nabyo ne kwikala kang’enda ne mwenyi, kechi oene mambo ne. Bakeba bubeji. Abyo byo byonka byo bakeba, bubeji. Bino, kechi mwakonshe kwibazhachisha bantu ne. Abo kechi bakonshe kwikikwasha ne. Abo batongwejlwe jimo ku kyokyo, basalululwa kwi akyo.

²⁷ Kabiji pano twamona kuuba mba abo babiji, ba butunshi ne bantu ba bumupashi, abyoy byo kyubiwa kimye kyonse. Abyo byobyoy kiji ne leelo. Kimye kyonse kikala muyekao musango.

²⁸ Kaina ne Abela. Mu bujimi bwa Edena, kimye Edena kyo alengelwe, kwajinga bichi bibiji abyoy muntu byo akonshe kusalapo aye mwine. Umo, waikele wa maana; mukwabo, waikele ke Bumi. Kwajinga bansongwalume babiji, Kaina ne Abela, bonse babiji bajinga babupopweshi. Umo wa mwi abo wakebelenga Bumi Bwapeenape, kabiji aye wapaine kwi Lesa, konka ku lwitabilo, kitapisho kyawama kukila kya kwa Kaina. Ke kipasha kyalumbuluka bingi kya bipwilo leelo: kipwilo kya ku mubiji, Kipwilo kya bumupashi. Kabiji kechi kujipo kyakuzhinauka ne bino Amiwa mbena kwaamba kumbaji yonse ibiji iji pano, kabiji kampepo awe tepu ukakonshe kwaamba kuba teni sauzande kwi abo.

²⁹ Bino, talai, kipwilo kya ku mubiji, ke kipwilo kya buntunshi. Kechi bakonshe kukiluka peulu ya kintu kicheche kya “Nelamikile ku kipwilo. Inge Naya ku kipwilo, inge Nakonshe kuuba mo Nakonshe kubila, akyo kyo kyonka Lesa kyo akeba.”

Pano, akyo kyo kintu kimo kyaubilepo Kaina. Aye waile na kulenga kyakukusokelapo. Aye walengele mulambo, kuleta bipangwa bya muntanda. Kabiji aye waambile mba, “Kiji bino, Lesa. Abyo byobyawamisha Amiwa byonjinabyo. Kisendai nangwa kwikisha.” Abyo byobiji newaitabila wa ku mubiji byo akonsha kuketekela leelo. “Nkambo, Amiwa ngya ku kipwilo. Amiwa katwela mu jibumba jawamisha jo Nakonsha kutana. Amiwa kalipila mu bya ntongwelwa byami ku kipwilo. Amiwa kooba kiji bulongo. Bino, kino kyo kyakila kuwama kyo Nakonsha kuuba. Amiwa nkakwasha kupota byakubika pa windo. Nangwa, Amiwa nkapana bivwalo kubaana.” Kijitu bulongo, kafwako kyatama kyakwambapo pa kyokyo ne. “Bino abyobyokiji, byo byonka. Inge Mubena kwikikeba, kisendai; inge Anweba mwabula kwikyuba, Kechi mwafwainwa kwikitambula ne.” Bino, ayo yo ngubilo ya kipwilo kya buntunshi leelo.

³⁰ Pakuba Kipwilo kya bumupashi! Abela, konka ku lumwekesho, konka ku bupe, wamwene kyakila pa kyokyo, kabiji ko kulwitabilo aye ko apaine kwi Lesa mulambo wawama kukila wa kwa Kaina. Kabiji wapaine lushimuno lwa bololoke bwanji, Lesa.

³¹ Kintutu kimo kyaubiwe mu Ishimela ne Izaka. Umo wajinga wa ku mubiji, kabiji mukwabo wajinga wa Mupashi. Umo, awa mwaanamukazhi muzha; umo, awa mwaanamukazhi wakasuluka.

³² Kyamwekele kintutu kimo mu Isalela ne Moabu, bipwilo bibiji bikatampe bibena kwiya pamo. Kabiji Isalela byo bakebelenga kuya ku kifulo kyabo kya mulaye, Kipwilo kya bumupashi, bantu bakwa Yakoba, Isalela kasa baji mujishinda; Isao bantu banji bebakumenye, Moabu, kipwilo kyabulume. Kabiji ntangi mukatampe wa kipwilo, Balamu, waishile na kufinga mulongo wanji, bino wataine mba kechi wakonsha kufinga mulongo wanji ne. Aye wakakelwe, na bumpofu bwa meso anji, pakuuba mba amone mutanchi watongwejlwe jimo, kyakuuba mba, kabiji ne kumona Kyambo kya Lesa.

³³ Kitanshi, “Lwitabilo lwiya pa kumvwa, ne kumvwa kwa Kyambo kya Lesa.” Nanchi waitabila umvwa Kyonka, ne Kwikutuluka, kabiji kwingijila pa Kyonka kya. Awa muntu wabuntushi ukomvwa Kyokya, akwa kululuma kwa Kyokya, bino kechi... *Kumvwa* kulumbulula mba “kukwatakanya” Kyokya. Talai pa, ke kutala pa kintu kimo; pakuuba kwikimona, ke kuuba mba “kwi kyumvwa” kye. “Inge muntu ne kusemwa jibiji ne, aye kechi wakonsha kumona nangwa kukwatakanya Bufumu bwa Lesa ne.”

³⁴ Pano, papo kwaishile Isalela, kasa abena kwiya na mulaye wakwa Lesa, amba batangijilwe ku ntanda ya mulaye. Kechi batunshi ne, kana baitabila, baitabila mwi Lesa umo awo Isalela ye ajinga nanji, baishile na kweseka kufinga mulongo wanji,

mambo aye waambile mba mulongo wanji uji, kine wajinga wabula koloka mambo waubile bintu byavula byatama. Bino, mwamona, aye wakankelwe kumona kusalululwa.

³⁵ Kintutu kimo na Isao ne Yakoba! Isao kyamwekele nobe muntu wawama. Aye waikele na kuuba bintu byawama. Aye—aye walamaizhe bashanji bapofu, wamutamwijile aye byakumwenamo, kabiji nekumulamaizha aye, kabiji wajinga nsongwalume wawama. Bintu byavula baitabila ba ku mubiji byo booba mu ndonda ya bupopweshi, kukwasha manyaunda, kabiji—kabiji ne kulipilila mali abantu akukipatela, kabiji nebyabupopweshi bintu, bino akyo kechi kyo Mbena kwambapo ne.

³⁶ Moabu wajinga wawama, kyaalo kikatampe, mulongo kwi aye. Kabiji Yakoba waubile bintu byonse, aye wajinga waluwakana; bino nangwa byonkabyo aye wajinga nakintu kimo kyakumwenamo, akya kyajinga kya mulaye, abwa bubeji. Awe ke eye Isalela, baana bakwa Yakoba, na kyo kine kintu. Pano ng'anyi ukekala bulongo?

³⁷ Balamu wanshimikile byakusokelapo sebeni; mu Isalela mwajinga byakusokelapo sebeni. Balamu wapaine milambo sebeni ya banyama babula biko; Isalela wapaine milambo sebeni ya banyama babula biko. Akwa, akwakonka abo inge bekisenda bukisho, Moabu wajinga mupopweshi pamotu ne Isalela byoajinga, Esao wajinga mupopweshi pamotu byonka byajinga Yakoba, kabiji Kaina wajinga mupopweshi byonka byajinga Abela. Bino, ke kusalululwa kokwa imenako kyokya.

³⁸ Wajinga mpofu byepi! Nga bumpofu bwa baana bakwa Isao, kwamba mwaila bumupashi, bena Moabu, bamulengulwile Isalela ne kwamba mba, “Talai pe abo. Abo kechi ba dinominesheni ne. Ke jibumba ja baluwakana. Baikelenga mu matente. Kabiji atweba twi kyaalo kikatampe. Baubile bya bubi. Kabiji kechi bajipo na kabungwe mukachi kabo ne. Abo babena kususutatu nakuzhokoloka, na kulondela ngauzhi.” Bino aye wakankelwe kumona Muloolo wa Lubemba ne Jibwe jo bapumako kasa jibalondela. Aye wakakelwe kumona aja jibumba ja-baitwa, jibumba jasalwa na kulondela ndonda ya Bulesa ya Lesa mu ntanda yamulaye.

³⁹ Abyo byobyoyo kiji mu buleelo. Baamba mba, “Ke jibumba ja booba kyongo-kyazhila. Ke jibumba ja bantu baji *bibye, byobyay*, nangwa *kikwabo*.” Bino bakakalwa kumona mba ke kulondela lubaji lwa Kyambo kya Lesa.

⁴⁰ Isalela wajinga mujishinda janji ja kuya ku ntanda ya mulaye. Lesa, mu Kyambo Kyanji, walaile mulaye.

⁴¹ Yakoba, ene mambo kyo asalulwile kutana awa bubeji, nangwa kikale byepi, wakebelenga kwikitambula, mambo aye wayukile mba abwa bubeji bobwalama mapesho. Kyalamine bumi. Aye kechi wateleko muchima musango mokyakonsha

kwishila ne, kikulutu aye wikitambula. Akya kyokyonka kyajinga kikatampe pe aye. Kana musango ka wandeke mokyafwainwa kwishila, kechi wikitele muchima ne. Aye wakebelenga. Kabiji aye wafwainwa kwikala nakyo. Kabiji aye wikitambwile. “Batokwa baumvwa nzala ne kilaka kya bololoke, bakekuta.” Aye wajinga palwendo lwanji, kabiji aye wikilondejile, kabiji aye wikitambwile.

⁴² Isalela wajinga palwendo lwanji lwa kuya ku ntanda ya mulaye. Nangwatu beena Muabu bavujile byepi kabiji ne mafingo obaesekele kubika pe abo, abo bailengatu kulutwe ku ntanda yamulaye.

⁴³ Kabiji leelo anweba kechi mwakonsha kwikyuba ne, nangwa kikaletu byepi nangwatu muzhilo akale byepi, nangwatu kwikale kumanyikwa byepi, nangwatu kwikale kumanyikwa byepi, bintu byatama byepi byo baamba, bimye binga byo batela mba uba *kyongo-kyazhila*, bimye binga byo baamba mba abye bintu byatama, akyo Kipwilo kikatwajijila, Kyafwainwa kuuba, Kyaikala mu Kyambo kya Lesa.

⁴⁴ Kimye kimo ba mamfumu babiji baishile pamo. Umo wa mwiabo wajinga Ahaba, mukwabo wajinga Yeoshafwata; Kipwilo kya bumupashi, kipwilo kya buntunshi.

⁴⁵ Ahaba wajinga waitabila bakumupaka. Aye wajinga na bangauzhi. Abo kechi bajinga batunshi ne. Kechi bajinga bapopweshi babakinshi ne. Bajinga bangauzhi babena Isalela, bino babjinga babulwa kabiji ne kuvwikwa biwvalo ku bena Ahaba mfumu. Kyajinga nobe kifulo akwa abo kobajinga nabyabumulwila ntanda byatundaikilwenga-konka.

⁴⁶ Yeoshafwata waishile konka, kwiya munshi, kabiji ne kulenga luvwang’ano, akyo kyatama.

⁴⁷ Anweba kechi mwafwainwa kunungakana na babula kwitabila ne. Atweba kechi twafwainwa, nangwa pachehetu ne, kubika mazhina etu mu mabuuku a bipwilo bibula kuketekela Mamboawama apwijijika. Kechi! Mukatwela mu lukatazho ne.

⁴⁸ Kabiji abo batwelele mulukatazho. Kabiji awe muntu waoloka waambile mba, “Kechi twakonsha kwipuzha Nkambo patanshi ne, kabiji tumone kana twakonsha kuya ku Limota-Gileda?”

⁴⁹ Pano monai byoyamwekele kulumbuluka aya-ndonda. “Atweba bene Limota-Gileda. Ke kipe kyetu, kabiji bena Silya bekifumishe kwi Lesa mumi. Bushe kechi twafwainwa kuya na kutambula ino ntanda nenyi?” Kabiji aye walengele byaambo byakutanga byawama bingi, kabiji byaitabilwa, kabiji byabololoke bingi, poso Yeoshafwata wauvwine kyonkakya.

⁵⁰ Kabiji, leelo, bantu bakonsha kwimana mu pupiti na maana akufunda ne ng’ambilo- yakulenga, kabiji ne kufunda, poso bakonsha kulondolola Bulume bwa Mupashi Wazhila

kufuma mu Baibolo. Bakonsha kulondolola lubuko lwa Bulesa kufumamo. Bakonsha kulondolola kwamba mu njimi ne kulumbulula, bakonsha kulondolola lubatizhilo lwa Mupashi Wazhila, juba jikwabo.

⁵¹ Pakuuba muntu wasajilwe kwi Lesa, muntu... “Mikoko yami yumvwa Jiwi Jami.” Anweba muji na bunsaji bwa Lesa pe anweba, kechi mukentutulamo mukyokya ne.

⁵² Yeoshafwata waambile mba, mfumu waoloka waambile mba, “Bushe kechi kujipo ngauzhi nenyi, pakuuba mba twakonsha kwipuzha Nkambo?” Ahaba wailenga kwakubula kikye.

⁵³ Abyo kipwilo kya buntunshi byo kibena kuuba leelo. Oo, bajinga na masemina ne na basapwishi bavula, baana balume bakatampe, bakatampe bamapulofesa, bamaana, balumbuluka, bafikilamo, oo, ami, kuya akwa kwalepa na—nabya wichi bya kipwilo na—... nangwatu, Kipwilo kyabumupashi.

⁵⁴ Mu moba akwa Nowa, mu oa moba, talai pa kipwilo kya kumubiji. Bajinga kika? Ba masayatisiti, banshimikishi, bantu bajimuka. Pakuuba basalululwa, Enoka ne Nowa, bajinga bakafunga ne banjimi, bekepesha, kechi bafunda ne, kechi bajimuka ne, bino bayukile Lesa wabo; kintu kimo mwi abo, kasa kibena kwenda, na kwita. Tusakufika ku kyokyo pa kakimye kacheche palutwe.

Bino, nanchi Yeoshafwata waambile mba, “Bushe kechi kujipo ngauzhi nenyi?”

⁵⁵ Oo, nangwatu byaonkabyo, mwaila buntushi bobaji nabo. “Kiine, atweba tujinabyo. Amiwa najinga na semina kokwa kuno, bavula bamwiabo.”

⁵⁶ Waletele foolo aduleendi. Pano, abo kechi batunshi ne. Abo ke bapopweshi ba Yehoba-Lesa. Iyai kuno, kabiji abo baambile mba, “Twayai atweba twikaleko pacheche kabiji ne bya bungauzhi.” Kabiji nanchi bonse bakapwilatu pamo. Kabiji babwelele, “Akyo Kyambo kya Nkambo,” kabiji baambile mba, “ABYO BYOBYAAMBA AYE NKAMBO.” Benaisalela bangauzhi. “ABYO BYOBYAAMBA AYE NKAMBO. Yaingatu, aye Nkambo uji nenu. Kabiji mwatola Limota-Gileda, mambo uji kulubaji lwa bena Isalela.” Kabiji umo wamubanabalume mwina muzhi walengelwe kwi aye nababiji namasengo akatampe akapotwe, nobe kyakwimenako, kabiji aye waile nakushindaika. Aye waambile mba, “Kukikye mu kapangamo Isalela... nangwa kufumyamo bena Silya kufuma kwi Limota-Gileda.”

Bino, Yeoshafwata, kintu kimo mwi aye!

⁵⁷ Oo, Naketekela mba Lesa waikala kikye mu muchima obe. Kafwako nangwa kimo kyo wakonsha kwifunjisha obewa mwine ne. Kechi kujipo kintu nangwa umo wakonsha kwitangijila

ne. Ke akya kya Lesa, mukusalulwila, kyaubiwa kwi anweba. “Kechi yewa unyema ne nangwa aye umweshana... Ke Lesa ye umweshana lusa.”

⁵⁸ Yeoshafwata waambile mba, “Abo ke bantu bamvwala-bulongo.” Kwakubula kuzhinauka aye waaambile kintu kimotu nobe kikye, “Bajinga namaana, kabiji baanabalume balumbuluka Amiwa byonauvwine kwi aye. Bajinga bafunda pakyokya kimye. Bajinga baimena mokyaila mukyokya. Baji nakukwatakana kukatampe monka mwi abo. Kabiji bajimuka, kabiji baji na Bukine bwavula bingi kwi abo.”

⁵⁹ Bilubo byonse biji na Bukine. Mukyokya kikatampe kyabubela kyonse kya ambiwe kyajinga nainte... [Kafwapo kijipo pa tepu—Waku.] pesenti kya Bukine mukyokya, abwa bubela abo Satana boabujile Eva.

⁶⁰ “Oo, ke Bukine bwavula bingi mu byo babena kwamba, bino kechi kujipo umo washalapo ne?”

⁶¹ Kyawama, bushe mwalangulula mbaka mwaila awa muntu byoambile? “Kimye atweba twajinga na foolo aduleendi kuno, mukyokya kyawamisha, mukyawamisha? Abo kechi bajinga kuno momwa mungyetu nakunyema mukuzhokoloka bwamba kichika, kabiji kyazhokolokele nakupombwa nakikoba kyamukoko, nangwatu kintu kimo. Ke bantu abo Amiwa bonajisha, Amiwa nebafunjisha. Kechi bantu babula kuyuka ABC’s wabo ne. Ke bafunda bingi, kabiji bayuka kine kintu. Bekala, mute ne bufuku, na kutanga mivungilo ya mabuuku kabiji ne bungauzhi. Abo bayuka akya kyawama. Amiwa najinga nabo sabenengezha. Kabiji baimana kuno na muchima umo, foolo aduleendi ba mwiabo, kasa baamba mba, ‘Yainga, Nkambo uji nenu.’”

⁶² Bino inge Nakonsha kutanga milanguluko yakwa Yeoshafwata pa mamineti acheche, “Kujitu kintu kimo akya kyabulwa kunembeshiwa,” aye wakonsheshe kwaamba amba. “Kujipo kintu kimo kyabula kumweka bulongo ne. Kechi kujipo umo washalapo ne, kuntu kumo?”

⁶³ “Oo,” waambile mba, “ee, kuji umo, bino kechi uji ku lubaji lwa kabungwe ne. Aye wajinga wapusanako nabalunda nanji. Aye ke nsatuki.” Aye wajinga nobe Yakoba. “Bino twakonsha kumwipuzha. Baamba mba aye ye ngauzhi. Bino Nazhinauka kyokyo, mambo aye kimye kyonse umfikatu amiwa, kwamba *kikye, kyokya*, nangwa *kikwabo*, nangwa aye kechi wajingapo nakyakwaula kyawama pe amiwa ne.” Bushe aye wakonsha kuba byepi? Mwaamona?

⁶⁴ Nanchi baambile mba, “Twayai tuye muletai. Aye ye mwaana Imula.” Nanchi baile bamuletele aye.

⁶⁵ Kabiji muntu umo wamukumenye mu mukwakwa, ne kwamba mba, “Pano, wambetu bintu bimo byo baambapo.

Obewa wafwainwa kwitabazhanya na kabungwe. Inge wabula kuuba byobyo, malwa obe!”

⁶⁶ Aye waambile mba, “Amiwa nsakwambatu kyonka Lesa kyo asakubika mukanwa kami, kabiji kafwako kintu kikwabo ne.”

⁶⁷ Nanchi panyuma yakuba mba aye watanwa kokwa, kabiji abo bajinga ne aye abwa bufuku, aye waambile mba, “Yaingatu, bino Najikumona Isalela wapalang’enamo nobe mikoko yabula kafunga.”

Kabiji Ahaba waambile mba, “Bushe kechi Nakubujile nenyi?”

⁶⁸ Pano, kwajinga bafoolo aduleendi baimenejilenga awa umo. Foolo aduleendi bafujishiwe, kujimuka, bafunda, banabalume bamaana baimenejile awa umo wamucheche kilubi, nobe byonka byotwakonsha kumutela aye, Mikaya. Muntu umo, bino nangwa byonkabyo awa muntu umo wajinga na Kyambo kya Nkambo, alo lolupusano. Yense wamwiabo wajinga wabubela, akya kyashinikishiwe kyabubela. Kika kyalengejile nanchi Mikaya kupusanako? Bushe wafwaijilwe kwikala kamulanda, pakuuba mba ekale wapusanako? Ine. Aye... Kika kyalengejile Mikaya kwikala wapusanako, aye waikela na Kyambo. Akyo Kyambo kya Lesa kyokyo aikele nakyo.

⁶⁹ Pano kyalailwa mba, mu ano moba, “Lesa uketulwila Mupashi Wanji.” Kyalailwa kwi Danyela, amba, “Bantu, mu moba inge jibwe jafikila pa kipasha kya kumaulu, bantu bayuka awa Lesa wabo bakoba bintu bikatampe.” Bungauzhi panyuma ya bungauzhi! Kabiji ne masemina onse, ntanda, kechi yakonsha kwikyumvwa ne. Lesa ukeyyuba, nangwa byonkabyo, kabiji bantu ba kekilondela. Mwamona? Kya buntunshi kabiji ne... Kipwilo kya kumubiji ne kipwilo kya Bulesa. Mwamona, Kyambo kilenga kypusanako.

⁷⁰ Abyo byo byalangulukile Yakoba, “Kabiji nangwa kikale byepi, Nayuka kechi Nakonsha kupesha ne kanatu Nakwata bubeji. Abwa bubeji ibo Amiwa nasaka kwikala nabo nekukwatako.”

⁷¹ Kabiji, bino Isao wikishikilwe, pakuuba baana banji bobatu kintu kimo, nangwa byonkabyo, ku jino juba. Abo bekishikwa. Kimye kyonse byo kyajinga.

⁷² Kimye kyonse kyo kuji kusangululwa, kimye kyonse kilupulatu bampundu. Ayo ke ng’ambilo ya bwitote, bino kine. Kimye kyo kwajinga kusemwa kufuma kwi Izaka ne Libeka, kwalengelwe bampundu. Kimye kyalengelwe ntanda, kyaletete bampundu, bichi bibiji. Kabiji kimye Kaina ne Abela basamekelwe, kyaletete bibiji. Kimye Ishimela ne Izaka byo basamekelwe, kyaletete babiji. Kabiji Isao byo asemekelwe ne Yakoba wasamekelwe, kyaletete babiji. Umo wa mwiabo, wa kumubiji (umo wa mwiabo, wa panopantanda); mukwabo, Wabulesa. Kabiji umo watajile ku mubiji, wa maana abantu;

mukwabo waenda na Mupashi. Kimye kyonse kikala muyekao musango. Kimye kipwilo kya bena Luther byo kyaishile. . .

⁷³ Twayai tutole Pentekositi, patanshi. Monai pa kusemwa kwa Pentekosito. Kyaletele kusangululwa kukatampe, kwabulume kwa ntanda yonse kwayukanyikilwe, Pentekositi. Kechi kyataile kimye kyabaya ne panyuma ya Pentekositi posotu Paulo waambile mba, amba, “Kwakonsha kwikala bantu baiya mukachi kabo, na bintu byatwalwa mungi, kabiji bafumyako bantu kwi Lesa.” Kabiji abyo kine byo baubile. Kileta bibiji.

⁷⁴ Kimye kipwilo kya Benaluther byo kyasemekelwe, Martin Luther waletete kusangululwa kwa bumupashi. Kechi kyajinga kyalepa ne poso byoashile kuno Isao, konkakwa kunyuma yanji, kabiji kabungwe kajinga konka. Kabiji kyaletele bibiji.

⁷⁵ Pano panyuma ya kyokyo, kwaishile ba Methodist, John Wesley, kusangululwa kwa bumupashi. Kabiji panyuma yabyoby, kwaishile kabungwe, kalengelwe konkakwa. Kabiji kyaletele bibiji.

⁷⁶ Kabiji panyuma ya kyokyo, ke kwiya kwa Pentekositi, ke kusangululwa. Kabiji pano bekyalwile ke kabungwe, kabiji pano babena kutwela mu kabungwe. Kabiji kileta babiji.

⁷⁷ Pakuuba awa lukunwa wa bumupashi wakwa Lesa mumi, nangwatu kyakonsha kwikala kang’enda, kupichila monka mukyokya, kimye kyonse kileta lwabano. Isao kechi wajinga wabanda kyabaya na Yakoba ne. Byonka byaubiletu Yakoba kutambulatu bubeji (jitotwe jakwa Lesa), kyaichilwe kulwabano. Kabiji umvwe muntu. . . Amiwa kechi nasakamana lubaji lo utanwako ne, inge kiji buntunshi, kabiji akwa kulubaji komutanwa kwakunyemena anweba na, aba bantu bomuteya nabo ngyuuka na, kabiji kufujisha kweni kwamunyaunda, kabiji ne bikwabotu; inge mwatambula bubeji, akya kintu kimo kiji mu muchima wenu kyanengezhiwa na Lesa, umvwe anweba mwatambula kyokya, kitwa alwa lwabano. “Lupukaimo mukachi kabo, kabiji wikale wa abanwako, byo byaamba Lesa.” Lwabano!

⁷⁸ Kipwilo kibiika panshi. Mwamona, kechi kyakonsha kutwajijila ne. Isao wajinga kipasha kyawama bingi kya waitabila wa ku mubiji leelo, kechi wakonsha kushinda ntanda ne. Aye kechi washinda bintu bya muntanda ne. Batwajijila nobe kubyabo byakuvundakanya, mwaila nzihilo yabo, mwaila musango wabo wabyakulenga-monka kabiji, baanabakazhi, pabilungi byabo, kabiji—kabiji ne kutenda nsuki yabo ne—ne kumvwala kaputula kakala kakacheche; kabiji—kabiji muntu watemwa kuya mu bishimikwa bya malwa, kabiji—kabiji ne kupepa tusanga, kabiji ne kwamba bisela bicheche byatama; kabiji baji kulubaji lwa kipwilo. Abo kechi bakonsha kushinda byobyoby bintu ne. Nangwatu Isao kechi wakonsha ne. Bino nangwa byonkabyo, kwikala bapopweshi, aye wapwishishetu

kuya ku maana a bumuntu. Akyo kyo kintu kimo kipwilo byo kyuuba leelo. “Tukekala batubungwe atweba. Atweba tukebika atwebene ponka pamo. Tukalenga mukoka wetu, nangwa ke kisho kyetu, nangwa kintu nobe byobyaya.”

⁷⁹ Kabiji yemusango wakipwilo mokibena kwendela leelo, bumupashi ne buntushi, poso kyaikala pamotu. Kechi kyapimpulwa ne, kabiji kechi kikapimpulwa ne.

⁸⁰ Buzhile bwa bulesa. Lesa, kwikala Lesa, wikimweshama Ayemwine. Inge kechi kwajinga mubi ne, inge kechi... Aye inge kechi waikela Mupulushi ne. Bino Aye wajinga Mupulushi ku ntendekelo, nanchi kechi kwajingapo kintu kyalubile ne. Kabiji Aye milanguluko Yanji yakwikala mupulushi, yaletete ndengamambo, kwafwainjilwe kwikala kintu kyakupulusha. Kasa kukyanyge kwikala kintu kiji kyonse kupuluka, kwafwainwa kwikala kintu kimo kyalubilamo. Kabiji bololoke Bwanji ne buzhile Bwanji! Inge kechi kwajingapo muntu—ke muntu wakolwa ne, Aye inge kechi waikela ubuka ne. Bino kufuma kutendekelo, kabiji akwa kubyakutendekelo, Aye wajinga ndetekelo kasa ikyangye kwikalako. Aye wajinga ng’anga. Nanchi kechi kwajingapo kintu kimo kyakolwa ne, nanchi kyamuletejile muntu wakolwa, pakuuba mba Aye ebabuke, pakuuba mba Aye akonshe kwikala ubuka.

⁸¹ Kufuma monka mukyokya kibamba Kyazhila kupitaila mwafuma lupulukilo, mwafuma mafingo. Kufuma ku bainanji ne bashanji bamo kwamweka Yakoba, kwamweka Isao. Mwamona? Ke Lesa. Aye kechi wakonsha kupimpula lunengezho Lwanji ne. Abo bafwainwa kuya mu musangotu umo. Kisemwa kyonse kyakonsha kwi kiswisha. Byo kyafwainwa. Mwaumvwa Amiwa mo ne kitazha nyi? Kyendesha ponka. Kwafwainwa kwikala muntu umo walubilamo, pa kupuluka. Kabiji inge akwa kwakonsha kwikala kyokya, Aye, Wanji... Aye kwikala Mupulushi walengele kyokya. Akyo kyazhika kita kikwabo Kyazhika.

⁸² Noba nsongwalume mucheche ao Amiwa yengambapo, kasa abena kuja bifuto bya mapezulu, ne bipadulo byakinga, aye wakebelenga saufa. Kabiji kikulutu kwajinga kintu kimo monka mwa kyenakukebesha saufa, kwafwainwa kwikala saufa kuntu kumo, patanshi, kwalengelwe. Kwafwainwa kwikala saufa kasa kukyanyge aye kwikala nakilaka. Kabiji akyo, awa saufa, kyamuletele aye, nanchi aye wabwelele jikwabo konkakwa ku saufa.

⁸³ Abyo Lesa byobyoyo aji ke Mupulushi. Kabiji kwafwainjilwe kwikala kintu kimo kyalubilamo, kya kupulusha, pa kumulengela Aye kwikala Mupulushi. Abyo byo byonka byo kibena kuuba, ke kukaya Lesa. Bintu byonse, biji mwi Aye; kechi mu musapwishi ne, kechi mu kipwilo ne, kechi mu kabungwe ne,

kana mwi Lesa, amba kusalululwa kechi kwakonsha kwimana bulongo ne. Mwamona? Kiji mwi Aye. Ee. Bena Luther. . .

⁸⁴ Kabiji twamona lwabano lukwabo, awa wajinga Abulahama ne Lota. Bajinga balongo. Bino Lota wajinga wa buntunshi. Aye kimye kyonse wajinga ubena kukeba kintu kikatampe, kintu kyajinga nabyavula byakubikako. Nobe byonka biji kolwe, nobe Amiwa byonakonsha kwaamba, kimye kyonse kufika kukintu kibena kusama. Awa mupashi kechi wibasha bantu ne, leelo. Bafika pa kyokya kintu. . . Baya monka mumuzhi, kabiji bakonsha kwiya na kintu kicheche kyakusukenya nobe bibye. Mwamona? Abo bakeba kipwilo kyabaisha mu muzhi, kafunga wabafunda bingi, akwa kuvwala bantu-byawama kokobaya, akwa kuya bameya, kuyewa muzhi. Ke yenkawa mupashi wa Isao. Kiine wajinga nakyabubeji, mukyakutatwilapotu, betelelenga abobene amba Kipwilo, bino bekitaile mambo bakilengulwile. Anweba kechi mwakonsha kwita bantu ne kufukama panshi kumanungo enu ne, kabiji ne kujila kabiji ne kulomba kwi Lesa ne, kabiji walupuka na kwikala na mpwijilo ya lubuko, ne kwimana ku kumanyikwa kwa ntanda, batambula Mupashi Wazhila. Kabiji abo—abo kechi bakonsha kuuba kyokyo ne. Abo bekikanyishe. Bekitela mba “jibumba ja booba kyongo-kyazhila.” Byonka byaamba Baibolo amba bakekyuba. Abo be kyuba mambo awa ye musango wabo. Ke musango wakyo. Nobe byonka biji kikwangala ne nkunda, abye bibiji ke bilenga. Babakama mambo byobyobaji. Abo kechi bakobapo, kechi, bakamonapo mukwabo ne, mambo abo kechi basemekwa kumona ne.

⁸⁵ Kabiji mukwabo, kechi wakonsha kumukanya kufuma ku kikyene ne, mambo ke kusalulula kwa Lesa. Aye wasemwa kwikala mwanamulume wa bumupashi nangwa mwanamukazhi wa bumupashi. Kintu kimo mwi aye kyokita. Oo, Na—Naketekela mba akye kisakufika pa kifulo kimo kyo twafwainwa kuuba, mwakonsha kumona byo Na—Natazha mukuuba mba, kupichila mu kwi kifumyapo. Pano Abulahama. . .

⁸⁶ Vulukai, kimye kyonse kyo bajinga bakwatakana pamo, kipwilo kya ku mubiji ne Kipwilo kya bumupashi, abo kechi batambwile mapesho ne. Yakoba kechi wapesheshe ne poso byo eabenye aye mwine kufuma ku Isao. Kabiji Abulahama kechi wapeshewe ne poso byo aabenwe kufuma kwi Lota.

⁸⁷ Lota wajinga na mpwijilo yanji icheche ya milombelo mu kipwilo kyanji kokwa, wafunjishe baana banji babalume ne babakazhi, kabiji ne abo. Bino waikela bumi bwa musango yewa, poso, byo atatwile kwamba mu kimye kya kumpelo, ba musekele.

⁸⁸ Kintutu kimo ne leelo! Anweba mwaamba pa lubuko lwa Bulesa ne bulume bwa Lesa, ne bikwabotu, abo bekiseka. Ke mupashi umotu. Aye yo mipashi ibiji ikatampe, ya bupopweshi, yoyakwata ntanda mubuzha; waitabila ne wabula lwitabilo,

waitabila ne kitabila-mbijinga, umo ubena kupashang'anya mukwabo. Pano Abulahama byo aabenye aye mwine. . .

⁸⁹ Bushe mwamonanyi? Yesu, mu kwamba Kwanji kwa Kwiya Kwanji, Kwiya kwabubiji, Aye waambile mba, "Byonka byo kyajinga mu moba akwa Nowa, bajilenga, ne kutoma, kwisongola, ne kwipana mumasongola." Bino Aye byo aambile pa moba akwa Lota, Aye kechi waambilepo kintu nangwa kimo pa kikye ne. "Nobe moba akwa Lota," akyo ke lumwekesho.

⁹⁰ Monai kyamwekele mumoba akwa Lota. Kwajinga Lota kokwa monka Musondoma, waikala bulongo konkakwa, wamaana bingi, waikale ke, umo wa banabalume bakatampe ba mu muzhi, chibishi wamambo, waikale mu nsakwa ne kuzhachisha bantu. Aye mukazhanji watainwe mumanyaunda monsetu amuyoya mizhi. Kabiji ne baana banji babakazhi, ne bonsetu bamwiabo, basongwelwe kubonka bayukanyikwa, bamaana bingi, bafunda-bingi, balumbuluka, bafikilamo. Kabiji Abulahama waikale mu tente mushi ya kinchi kya maoka. Bino juba jimo bajinga na lupempu.

⁹¹ Kabiji kwajinga musapwishi wafunda waishile na kusapwila, kabiji wibechile. Talai pa—monai pa mbila, "Fumaimo," aye waambile kwi Lota.

⁹² Kabiji kechi waichilwepo kana kechi kyajinga lusa lwa kwa Abulahama ne. Waambile mba, "Bushe Nakonsha kutana bantu fifite, Mwakonsha kwikipulusha nyi? Nakonsha kutana bantu sate? Nakonsha Amiwa. . . Inge Nakonsha kutana teni?" Akyo kijitu kwalepa nobe byo afwainwa kuya. Kabiji Aye kechi wakonsheshe kutana teni mukachi kabo ne.

⁹³ Kechi kyakukumya ne, "Byonka byokyajinga mu moba akwa Nowa." Vulukai, Nowa kechi wajinga kipasha kya Kipwilo ne; Enoka wajinga, akya kechi kyapichile monka mulumanamo ne, bino akya kyatuntulwilwe akwa kumanama kasa kukyanye kwikajikwa. Enoka waile ku Nzubo, aye kechi wapichile mu malwa akatampe ne. Nowa wapichilemo.

⁹⁴ Pano, mweshai bulongo byo tubena kwenda mu kikye. Monai musango ka wa kiyukilo kyakwa Abulahama ne kisemi kyanji kyo bajinga naky. Baji na Kya bulesa. "Abulahama!" Wayukile byepi Aye amba wajinga Abulahama? "Mukazhi obe uji kwepi, Sala?" Wayukile byepi mba wasongwele, nangwa wajinga na mukazhi, Sala?

"Aye uji mu tente."

⁹⁵ Pano, Mwanamulume waikala popa, na kuja nyama, watoma mukaka, ne kuja shinkwa wa kajo, "Mukazhi obe uji kwepi, Sala?" Wayukile byepi kyokya kintu? Wayukile byepi Aye? Kilangulukaitu. Anweba mutela. . . Anweba bantu ba bumupashi, lekai kikye kiye mwi anweba. Pano Aye wayukile byepi kyokyo, byo Aubile byubilo nobe mwenyi, lukungu pa bya kuvwala Byanji?

Kabiji Abulahama byo aambile mba, “Uji mutente, kunyuma Yenu.”

⁹⁶ Kabiji Aye waambile mba, “Amiwa mbeni kuya ku...” “Amiwa, Amiwa,” ke ng’ambilo yakutazha ku bumuntu. “Amiwa,” awe Muntu, Lesa ubena kwimwisha Ayemwine mu mubiji. Lesa! Abulahama Wamutelele mba Elohimu. “Amiwa, Mbeni kwimupempula anweba. Amiwa sakulama mulaye Wami. Kabiji mwaila kimye kya bumi, Amiwa kakupempula, kabiji ukekala na yiwe nsongwalume ye Najikwamba kwi obewa.” Kabiji Abulahama, aduleendi; Sala, naite.

⁹⁷ Kabiji Sala, kunyuma kwine mu tente; pepi nobe foolo a matete acheche, mwine tente waikela kunyuma. Kunyuma nabyakuzhikula, aye wajinga nakuvwa. Aye wauvwine. Kabiji mu muchima wani na kumwemwesele, waambile mba, “Amiwa, mwanamukazhi mukote wa myaka aduleendi, kabiji nkambo yami,” mulume wani, “nkambo yami, kabiji mukote, kabiji langulukai mba tukekala pamo na lusekelo ne jikwabo, nobe bantu banyike besongola? Oo, kyakonsha kwikala byepi?” Kabiji aye wajinga namusango wakumwemwesele.

⁹⁸ Aye wajinga na nyuma Yaji yavundamina ku tente. Aye waambile mba, “Kika kyo asekelo?” Oo, mulongo, abyo byobyo kiji!

⁹⁹ Talai pa kipwilo kya buntunshi na kusapwila Mamboawama kwi abo. Billy Graham wakataka kabiji ne abo kokwa na kusapwila Mamboawama, “Balupukamo!” Bino abo baishile nyi? Ine. Kiine, kiine, kiine, bachechetu.

¹⁰⁰ Monai jibumba jakwa Abulahama, baitwa-kufuma. Pano monai. Kabiji Aye wamupele kiky kiyukilo, kabiji Aye wamuketekejile Aye. Kabiji Aye wapwile kasa aye akyangye, kabiji waile konkwa. Oo, byokikala kimye kyonsetu na akwa kwabanwa, baitwa-motu!

¹⁰¹ Pano, aye mipashi ibiji. Bya kupelawizhako nenu, pakuuba mba mfike pa kifulo kyami apo po Nakeba mba anweba mumone. Ao mabumba abiji akwatakana pamo, kupita mu mankulo onse, kufumatu ku ntendekelo ya kimye, kipwilo kya ku mubiji, Kipwilo kya bumupashi. Bapitamo mu Lulayang’ano Lwakala, bajinga kupita mu Lulayang’ano Lupa, kabiji byo baji ne leelo.

¹⁰² Pano, pepi nobe myaka tuu sauzande yapita, kyaishile ku mutwe, kabiji kyaishile peulu ya bantu babiji: umo wa mwiabo, Yesu Kilishitu; ne mukwabo, Yudas Isakalyota. Bino, Yesu wakwatakana na Kwiya, kwa Kwiya Kwanji kwa bubiji, amba aye mipashi ibiji yakonsha kwikala yavula yapusanako kukila byokyajinga kokwa kunyuma. Pano papo po Nakeba mba anweba mubike byenu—byenu bivwalo bya Lukumo. Aye mipashi ibiji ikekala yapusanako. Mambo, Satana waishile ne kwikala mu muntu ao wajinga membala wa kipwilo, Yudas

Isakalyota, abo baiklele mu kipwilo kya butunshi, kabiji bajinga mulunda ku kipwilo kimye kyonse. Bino aye wayishile ne—ne kujimbaika, nangwa kulanguluka mba wajimbaika mulongo wani. Aye wayishile mukachi kabo ne kwipashang’anya kwikala umo wa mwi abo; batompele bintu byawama bya kwa Lesa, waindele monka mu mupashi, kasa abena kumweka nobe, waile kokwa na kusapwila Mamboawama, kabiji ne kupanga bandemona. Bino mukachi kanji, kimye kyonse, wajinga Yudasa, mukutatulatu. Aye Baibolo waamba mba, “Aye wasemekelwe mwaana walaonaiko.”

¹⁰³ Pano vulukai, kuji kipwilo kya buntunshi kunyuma kokwa, Isao, ba Faliseo ne ba Saduseya.

¹⁰⁴ Bino talai awe nsongwalume ao walangulukile ayemwine nobe ke... Aye ukaya kulutwe na Mbila pa kimye kicheche, bino kechi ubena kukeba kubikapo maboko anji pa Kikye ne. Monai aya mipashi? Yesu waambile mba, “Kikekalatu peepipepi kyakuuba mba, kya konsha kujimbaika bonka Basalululwa,” Basalululwa, inge mwakonsha kumona, “inge kyakonsheka kubiwa.” Bino kechi kyakonsheka ne. Mwamona, kikakonsha kujimbaika.

¹⁰⁵ Pano talai, kechitu kipwilo kyabuntunshi ne, kuji kijipo kokwa kimo, akya kyonka kyakimye kyonse kipwilo, ke jibumba ja Isao.

¹⁰⁶ Twayai pano tumone jibumba jabena Yuda, abo baikala kwalepesha nabusatuki nabyakuzhatwa, kwalepesha nabusatuki nabyakuzhatwa, kwiya monka mumaboko alumbuluka amapesho. Kijitu pamo nobe mu Bahebelu 6 ne 10, byonka byo aambile, “Bajingapo kimye kimo bakutolamo lubanji kabiji batolamo lubanji lwabulume bwamutanda bwaishile, kabiji kyaubiwa byonsetu bintu. inge... kabiji nanchi abo batambwile maana abya Bukiine, kabiji nanchi inge abo bekiswisha kwaluluka byobyoy.” “mukwiswishatu” kyo kika? “Kubala aa Mashilululayang’ano, amo mo batokeshijilwe, ke kintu kyabula kuzhila.”

¹⁰⁷ Lekai ne mupe kyakumwenako. Byokiji. Uno ke muntu, aye ke mulongo wawama, nsongwalume wawama. Aye waitwa, aye umvwa mu muchima wani aye ukeba kwikala wamwingilo. Kijitu bulongo, aye wamutambula Yesu kwikala Mupulushi wabo. Aye ke nsongwalume wawama, kafwako wakonsha kwamba kyatama pe aye ne. Pakupitapo kimye kicheche, mutwe wa kutokeshiwa. Mwanamulume ukumpwa inge watala pa banabakazhi. Aye... Kiji mwi aye. Mwamona? Kabiji nanchi, kintu kyalondelapo, kampe aye wapepele, kabiji aye ubena kukeba kupepa. Kapempe aye ukeba kuteya magemu. Kapepo aye ukeba kuuba kintu kyatama. Aye wayuka mba kechi wakonsha kuuba kyokyo ne, nanchi aye waamba mba, “Anweba

Lesa, ingijishai Mashai akwa Yesu kwi amiwa, kabiji ne kuzhijika amiwa.”

¹⁰⁸ Kabiji aye watokeshiwa. Aye wakonsha kubijika, jitotwe ja Nkambo, wauba bintu bimo, ne aye, waya na kuuba kintu kimo. Vulukai, Yesu waambile mba awa musango ukekalako pa joja juba. “Bavula bakeya ne kwaamba mba, ‘Nkambo, bushe kechi Naawilenga nenyi, basapwijilenga? Bushe kechi Napangilengamo bademona, mu Jizhina Jenu nenyi?’” Yesu waambile mba, “‘Amiwa kechi nayuka ne, anweba banguba bibi.’” Monai, byooyo baji.

¹⁰⁹ Pano monai kikyeye. Atweba tubena kwiya nakulenga ma aduleendi ama milyoni a nsuki, konka kwa kwatwa kubiji kwampoko ya Mamboawama, “Yatwa kukila mpoko yatwa-kubiji, ichibankanya ne kupita mubikupa, kabiji ne Mumikolokofwa!” Aleluya! Lesa, lekai kipita mukikye. “Aye Upima milanguluko ya maana.” Ao o Mamboawama, Bulume bwa Lesa. Akyo Kyambo kya Lesa kyasololwa ke Mamboawama.

Mwamba mba, “Aye Baibolo waamba. Akyo—akyo ke Kyambo kya Lesa.”

¹¹⁰ Kyawama, Kyambo kyasololwa ke Mamboawama. Ao Mamboawama aishile kwi atweba kechi kupichila mu Kyambo kyonka ne, kana kupichila mu bulume ne kumweshwa byubilo bya Mupashi Wazhila, mu kumweshwa Bulume, kulengela Mamboawama kwikala na bumi.

¹¹¹ Byo Naile ku India, akibishopu wa—wa kipwilo kya Methodist walupukilemo, waambile mba, “Mr. Branham, atweba kechi tubena kukeba kuyukapo kintu kimo pa bamishonyi ne. Twayuka byavula pa Baibolo kukila anweba bonse byo mwayuka.” Waambile mba, “Atweba twajinga kipwilo, kabiji mwaikela kuno myaka tuu sauzande kasa ukyangye kwikala kyaalo.” Abyo ibyo. Bino waambile mba, “Tubena kumvwa mba Lesa ubena kwimupempula ne kuleta kya bupe kyakonsha kulengela yiwe Baibolo kwikala na bumi.” Waambile mba, “Akyo kyo batako muchima.” Oo, ami! Monai, awa muntu wajinga mwaana, kechi bankana ne, nobe byaambile Davida. Mwamona? “Tubena kukeba kuyuka. Bushe kyakine nyi?”

¹¹² Naambile namba, “Kinetu, kya bukyine. ‘Yesu Kilishitu ujitu pamo keesha, leelo, ne myaka yonse.’”

¹¹³ Pano, monai aye, kipwilo kya ku mubiji kibena kumanyika Kipwilo kya bumupashi. Pano, twatana mba awa Yudasa wafwanyikizhilenga kwikala mulongo, ke mulongo, kabiji nanchi waishilenga mukukoma kabiji kyapelako wafikile konka kukipimo.

¹¹⁴ Pano monai yiwe musapwishi mwanyike. Aye waishile ku mpuzha, waambile mba, “Nkambo, Amiwa natajilenga pa banabakazhi. Amiwa kechi nakonsha kuuba kyokyo ne. Amiwa

naikala, mwayukatu, musango wa kuuba bintu bya muntanda. Amiwa kechi nakonsha kuuba kyokyo ne. Amiwa nabatayanga mali ami pa kwikyombesha pa mbili. Amiwa—Amiwa kechi nakonsha kuuba kyokyo ne. Amiwa—Amiwa nayanga kila bufuku na kumwesha bipikichala. Amiwa kechi nakonsha kuuba kyokyo ne. Amiwa nguvwa bulongo nabyonka byabipikichala byatama kabiji ne bintu nobe byobya, Amiwa nabika na pinyiponka konka kukibamba kyami. Amiwa kenakonsha kuba kyokya ne. Abyo byo bintu bya muntanda. Ntokeshai amiwa, Nkambo!”

¹¹⁵ Kabiji aye Nkambo waambile mba, “Kijitu bulongo, Amiwa nsakuuba kyokyo.” Aye wabika Mashi akwa Yesu Kilishitu ne ku mubingisha aye.

¹¹⁶ Nanchi, kimye aye kyoaubile kyokya, bufuku bumo aye wailea ne kuvwa kintu kimo. Aye waile konkakwa na kuvwa. Aye umvwa lubatizhilo lwa Mupashi Wazhila, ne kuyuzhiwa kwa Mupashi. Pano aye watalamo mu kikye, “Oo, ami, bushe akyo kechi kyawama nenyi! Bino, waambile mba, kyakonsha konauna mwingilo wami inge Nakonsha kusapwila kyokya. Awa wakonsha kulengela ba mami kunyema amiwa kufuma kunzubo. Bakonsha kunyema ami kufuma mu kipwilo kyami inge Amiwa naiya kukyokyo. Oo, Amiwa kyawama kuleka pa kyokyo. Bino lekai ne kilangulukepo pa kyokyo. Ee, akyo bo Bukine, Baibolo.”

¹¹⁷ Kyawama, nobe wamwingilo umo waya bingi nkuwa, ntanda-yonse wayukanyikwa, batana katataka (kupichila mu muntu wajinga ne amiwa ku Puerto Rico) pa manungo anji, na kwamba munjimi, mu London, England; ke muntu wabulume bingi, ke umo mukatampe wabasapwishi bajimo muntanda leelo. Kabiji awe mwanamulume, mulongo wanji wajinga ne amiwa kuno, muntu wayulwa-na Mupashi, waishile kwi aye ne kwamba mba, “Oo, mulongo, byokiji!”

¹¹⁸ Aye waambile mba, “Amiwa ne kiyuka. Amiwa ne kiyuka. Bino, talai, leka nkubulepo kintu kimo.”

¹¹⁹ Aye waambile, “Sapwilai ponka pano. Sapwilai ponka. Awe ye awala. Nabongozhi bwenu konka kuno, anweba mwakonsha kusunkenya ntanda.”

¹²⁰ Aye waambile mba, “Ine, kechi Nakonsha kwikisapwila ne. Mwamona, akyo—akyo kipwilo kyakonsha kungalulula. Amiwa kuuba nasapwila kyokyo ne. Amiwa kuuba ne kyuba ne.” Oo, mulongo!

¹²¹ “Natambula na- . . . kintu kimo akyo kyakutokeshiwa kabiji kyaiya nakutambula aa maana abu Kiine, talai mwi Akyo, monai amba Kijitu bulongo; kabiji ne kufumapo, pakuuba mba bepopela abobene Mwaana Lesa, kabiji ne kibika pe Aye mukushinkula abwa bumvu, bumvu bwa Mamboawama.”

¹²² Paulo waambile mba, “Amiwa kechi ne omvwina bumvu Mamboawama a Yesu Kilishitu, mambo Kebulume bwa kwa

Lesa bwa kulupulukilo.” Ke Bulume bwa Lesa bubena kwingila mukachi ka Kipwilo Kyanji.

¹²³ Bino baambile mba, “Amiwa kechi nakonsha kuuba kyokyo ne.” Awe muntu waambile mba, “Bakalangulukanga mba ba pentekosito. Bakonsha nkulenga amiwa...” Aye waambile mba, “Ami—ami akwakutamishiwa kwa jizhina kwakonsha kufumapo.” Oo, mulongo!

¹²⁴ Amiwa kechi nafwainwa kupita mutamishiwa kwa jizhina ne. Amiwa mbena kulanguluka pe Aye. Aye kutamishiwa kwanji, akwa kwaka yenkayetu Umo.

¹²⁵ Bino monai byo bakonsha kufwenya pepi Nakyo, mwayukatu, “Kabiji ke kusula Mashu alulayang’ano amo mo azhijikilwemo, akya kintu kyatokeshiwa kwi aye kabiji kyatolwa kwi aye kufumya mu ntanda, kabiji ne kweseka kumubika aye monka Munu. Kabiji pano watala pa Kikye, kabiji uji na maana a Kikye. Kwaluluka kufumako ku Akyo, kechi kwakishala kitapisho kya bubi ne,” byo byaamba Baibolo, “poso luketekelo luleeta moyo lwa kuketekela luzhachisho ne mujilo wakatazhatu ukebaja balwany. ‘Mambo kushinkanya ko kwami,’ waambile mba Nkambo. Aye wasujile Mosesa’ mizhilo, wafwile kwakubula lusa ne, monka mubatumonyi babiji nangwa basatu. Bushe kyakonsha kwikala byepi mwaila akwa kukambulwa, kabiji akwa kukambulwa kwabaya, nangwatu kwafikilamo, ke wa mwingilo ao wafwainwa wasuminwa Mashu akwa Yesu Kilishitu konka kumaulu anji, panyuma ya kutambula maana a Bukine, kabiji ne Kwikibala nobe ke kintu kyabula kuzhila.” Yii!

¹²⁶ Monai pepi po tuji? Yesu waambile mba, “Ikalai bajimuka.” Mwamona Yudasa byo ajinga? Aye wajingatu bulongo nabo. Aye wajinga Isao, walengwa kwikala mukatampe mu ino nkulo. Aye wajinga mujimbijimbi, wakufwainyikizha, walengelwe mukatampe mu ino nkulo. Kuno aye koaishile konkakwa, ne jikwabo, ke mulongo wakwa Yesu, wakufwainyikizha mulongo. Bino mu muchima wani, wajinga na kipwilo kyakala kya buntunshi kimye kyonse, mambo apo ipo po apoteshe Yesu. Aye wapotesha Yesu, bubeji bwanji, nobe byonka byauble Isao pa supu yankunde. Aye wapoteshe bubeji bwanji pa mali a masiliva sate.

¹²⁷ Bavula mwanamulume ne mwanamukazhi leelo bapotesha bubeji bwabo bwa bumupashi pa kuyukanyikwa, kintu kicheche kyabyonkabya kiji muntanda anweba kyomwafwainwa kushinda; kintu kicheche, banabakazhi, kuvwala mameka—pu kabiji ne nsuki yakwichika, kuvwala byaipipa bivwalo; banabalume, bisela bicheche byatama ne kupepa fwaka, kintu kimo kya muntanda. “Inge mwatemwa ntanda nangwa bintu bya muntanda, butemwe bwakwa Lesa kechi buji mwi obewa ne,” byo byaamba Baibolo.

128 Amiwa kechi mbena kukeba kwimukozha ku michima ne, bino tubena kwiya kumpelo. Tubena kwiya pano, tubena kwiya peulu ya ndandalashi bukiji bukiji.

129 Mwamona byo kiji nyi? Abo bekyuba. Abo batongwejilwe jimo. Bakonsha kupashang'anya ne kwikala bawama ne kwikepesha, bajitu pepi, nobe Benakilishitu, baji bingi pepi kyakuuba mba bakonsha kujimbaika bonka Basalwa; pakuuba konka ku bipangwa byabo ko mukebayukila.

130 Mwanamukazhi umvwala tuputula, kechi wamwekelenga nobe Mwinakilishitu ne, kwi amiwa. Aye Baibolo waamba mba, "Ke kintu kyabubi kabiji ke kintu kyabumvu mwanamukazhi kutenda nsuki yanji." Kujitu umotu mwanamukazhi mu Baibolo wipentele kilungi kyonsetu, wajinga Yezebela.

131 Pano nga banabalume, anweba banabalume mwafwainwa kwikala banabalume Benakilishitu, kabiji mwibaleka bakazhi benu kuuba kyokyo? Kimye, Lesa kyo ukakuzhachisha namambo a kikyee! Kechi muntu ne! Buntunshi! "Oo, Amiwa nsakuya na kutwela mu kino kipwilo." [Kafwapo bijipo pa tepu ne—Waku.] "...obewa walanguluka pa kikye." Abyo kine akyo Kinembelo byo kyaamba mba byobakooba, kabiji abyo kine byo baubile. Kabiji abyo byo bakooba, kunekenya bintu!

132 Muntu umo waambile mba, "Billy, inge wabula kwimana kyokyo, ukafumako muntu yense."

133 Kujitu Kintu kimo akyo kibula kuya, aye Mupashi Wazhila, mambo Ke Kyambo Kyanji. Kabiji waitabila kyakine kechi wakonsha kufumako ne, mambo Ke Kajo ka mweo wanji. Aye Wikitemwa. Kafwako nangwa kimo kyakonsha kumukanya kufuma kwi Akyo ne. Aye ukoba kintu kiji kyonse, nobe Yakoba, bino ukeba awa bubeji. Aye ukemana popa. Amiwa kechi nataka muchima ne nangwa usende mulunda yense ye uji nanji, inge kyakonsha kukatazha mwingilo wanji, inge kyakonsha kukatazha kipwilo kyanji ne bumembala bwanji, inge kyakosha kukatazha bintu byonsetu. Aye ukekikwachijilatu, mambo kechi wakonsha kwi kikwasha ne. Mujipo kintu kimo mwi aye, kibena kwenda kuya, lwito lwazhika kuya ku Mushiji. Oo, abyo byokiji, kintu kimo mwi aye!

134 Talai, kintu kyonse kyomubena kukeba anweba kutana mu Baibolo, kabiji nekwikitola monka, bwelai monka Muntendekelo kabiji ne kumona akwa kokyatetwijiilwe, ne kumona akwa kokibena kuyila. Mipashi yonsetu kabiji ibena kwenda ne leelo kubwela konka ku Ntendekelo. Abyo byo twauba, pa kushinikisha bibye bintu byo ubena kumona, balunda. Kechi mulubeko kyokyo ne. Kechi mwibileke bipite peulu ya mutwe wenu ne. Lekai kitwele mwi anweba. Abyo byo bintu bya kwa Lesa. Kyaishile ke mutwe; kabiji Yesu waambijile jimo amba kukekala mutwe jibiji mu moba akapelako, kabiji kikekala ke kya kikyee: katetesho kakwa Lesa, kabiji ne kiyukilo kya

lukinyama; bulume bubiji bwa bulume bwa bumupashi bubena kwingila pamo.

¹³⁵ Bino, uji yense wayuka mba Katetesho kakwa Lesa ke bubeji, lubatizhilo lwa Mupashi Wazhila. Efisesa 4:30, waamba mba, “Kechi mufichishe pa muchima Mupashi Wazhila wakwa Lesa ne, imo mo mwabikijilwe katetesho kufika ne ku juba ja bukuzhi bweni.” Kimye kyo basemwa jibiji, bayuzhiwe na Mupashi Wazhila. Aye Mupashi Wazhila ke Kusemwa kupya, twayuka kyokyo. Anweba—anweba mwibatamwikwa na Mupashi, Amiwa ne kiswa kyo. Bino poso anweba mwasemwa!

¹³⁶ Kuji mwaana watemwikwa monka munda mwainanji, ujipo namusango umotu wa bumi. Abwa ke bumi, kabiji ke kichechetu... ke kichechetu kya jishi jabumi monka mumubiji ne kuvwanga’ankana kabiji ne kwikifumya mukutolokela nobe *byobya*. Bino inge wasemwa, kiji na... [Mulongo Branham watota maboko anji—Waku.] nobe byobya, kabiji aye watamine muteto, wikala ke mweo mumi.

¹³⁷ Kabiji mwaana wakonsha kuya ku kipwilo ne kwamba mba, “Oo, Naketekela mu kipwilo. Amiwa—Amiwa nsakuya, Amiwa kekyuba kiky. Kabiji Amiwa ne wawama... Nasaka kuuba bulongo, Nasaka kuuba bulongo.” Bino kikebwa Mamboawama akwikibusha akya kyonka, ne kwikitwala ku Bumi bwa Penape; kabiji Mupashi Wazhila ubijika mwi akyo, nobe kechi Wabijikilepo kala ne. Nanchi ke kilengwa kipya, wasemwa ku Mupashi. Nanchi ne kutatula kukoma, nekwenda, kabiji uji namusango wanji monka mwi Lesa; mwamona, nobe byonka binji mwaana walukeke, muntu wakumubiji, byoanji musango wanji monka muntanda.

¹³⁸ Nanchi inge tente wetu wa panopantanda ye twaikalamo wapopololwa, tuji na mukwabo ubena kupembelela, mwamona. Kijitu pamo nobe mubiji wa kumubiji byo aishilenga, kuji kokwa mubiji wabumupashi wakwikitambula inge akya kyafuma monka mubainanji. Kabiji kimye kyakufuma ku bainanji, pantanda, akya kyaikala, keji munda mubainanji pakino kimye, mukubinza, nekujila, (O, Lesa!), kubinza, nakwingila, ne kukota mummyaka, kabiji ne misongo, kabiji nebyonsetu bitanwa mubwikalo bwamuntanda, kabiji mupashi uji mukachi kakyo kasa abena kukeba ntanda kubushiya bwa mukola. Ke kubinza, kwivawanga, (ee, mwane) mambo akwa kuji bumi koko ekala ne kikupu. Kiji mu mubiji ao wafwainwa kufwa. Kabiji kimye kimo, nobe inanzi byo aponene mwaana wa ku mubiji, kabiji ne mubiji wa bumupashi uji nakyo; ntanda ikapona, kabiji ne mubiji wa buntunshi ukapona, kabiji mubiji wakubuntushi... nangwa byakuvwa kumubiji byaikala byepi monka mwa. Inge uno tente wapopololwa, tuji na mukwabo ubena kupembelela. Ao oene mambo kyo ulubako bintu bya muntanda. Abyo byafwa, kwi obewa. Ao ye Mupashi.

Pano kimonai byo tubena kuya kulutwe, aye mipashi ibiji.

¹³⁹ Aye Mupashi Wazhila ke Kusemwa kupya, twayuka kyokyo. Ke kusemwa jibiji, ku Mupashi wakwa Lesa. Abyo byo musemekwa, ku Mupashi. Kusemwa ku Mupashi, ako ko Kusemwa kupya. Kijitu bulongo. Obewa wasemwa ku Mupashi; nanchi umvwe wasemwa ku Mupashi, obewa wayuzhiwa na Mupashi Wazhila. Kijitu bulongo.

¹⁴⁰ Pano inge abo babiji baji pantanda, ku mubiji ne ku mupashi, bimye bimo ba . . . Namona kikye. Pano mu kupezhako, Nasaka kwiya pepi, pa kwamba kikye pa mamineti acheche. Ku mubiji nangwa ku mupashi, umu . . . Pano Naketekela mba muntu yense usakukwata kikye. Pano ikalaitu nzoo kabiji na munema byonka byo mwakonsha kuuba.

¹⁴¹ Pano, anweba mwamonapo kala kikye nyi? Mwamona mu bipwilo byetu leelo, ne mu mabumba amo mo twabenye atweba bene kabiji twalenga tubungwe; kabiji twamona byonse bye. Kabiji mwamona muntu umu watola Kinembelo kimo, kabiji, mulongo, awa muntu wakonsha kutola akya Kinembelo ne kwikilenga kwikala kipya, kwikilenga kwikala monka mo kyalaila mu Baibolo papo. Kabiji muntu walondelapo ukamumona wikyuba, kabiji aye ukeya ne kweseka wikyuba, kabiji kukakalwa. Naketekela mba anweba mubena kutanga pano. Aye ukankakalwa. Kika? Akyo Kinembelo kechi kyatundaikwa na aye ne. Aye ubena kwesekatu kupashang'anya. Aye ubena kweseka kuuba byubilo nobe kintu kimo. Aye kechi wajinga . . . Kyawama, kapepo watumwa ku muntu. Kampepo muntu umu waambile mba, "Kyawama, wakonsha kuuba kintutu kimo." Monai, byonka byaambile Yesu amba kikekala muiwe musango. Aye Baibolo wikitongwejile jimo mu moba akumpelo, "Byonka Yanesa ne Yambalesa byo baimejile Mosesa."

¹⁴² Kwajinga Mosesa, kabiji Yanesa byo aimene. Kabiji Mosesa wataile panshi mukombo wanyi, kabiji waikela ke muloolo. "Kika," Felo waambile mba, "iyai kuno, Yambalesa, wakonsha kuuba kintu kimo." Kabiji wikyubile, mwamona. Bino kika kyamwekele nyi? Nanchi konto yakwa Mosesa yajile konto yanyi. Mwamona, kyalengele kusololwa. Kwepi kwajinga aya konto yanyi?

¹⁴³ Kijitu nobe mwaila ndangulukilo yajojajana. Kiji nobe kintu kya bumupashi. Kijitu pamo nobe bipwilo bimo byo baketekela buntunshi, kwalepa bingi. Bintu bya . . . Baamba mba, "Kika, akya kyajinga kya mu juba jikwabo." Bonse bajitu pamo. Bino talai yiwe mupashi mu moba akupelelako waya na kupashang'anya Mupashi wakine. Mwamona? Apo po patanwa lukatazho lobe. Kijitu pamo nobe umu wakine, mwamona; bino aye kechi wakonsheshe kwikilengela kumwekanyika ne, aye

kechi wakonsheshe kulenga kya kwikikwajijila ne, aye kechi wikilekele kyabanda ne. O Lesa!

¹⁴⁴ Bantu beya ne kwamba mba, “Amiwa njina Mupashi Wazhila, ne abo.” Monai byo baikala na bumi; kechi kyapelako ne kufuma ku kusangululwa kumo kuya ku kwabo, kufuma ku mbung’eno imo kuya ku ikwabo. Kyalengele kusololwa, abo kechi bajinga Nakyo ne. Inge mwanamulume wasemwa ku Mupashi wakwa Lesa, nangwa mwanamukazhi, baji na bipangwa bya Mupashi. Benda ba bulesa. Abo beekala abwa bumi. Mwamona? Fumaiko ku bintu bya muntanda. Lesa utwela mukachi kabo ne kwilenga Ayemwine kwimwesha, kabiji ne kushiniikisha amba Aye ye Lesa ubena kwingila momwa. Mukwabo ubena kupashang’anya. Mwamona?

¹⁴⁵ Kufwanyikizha, akyo kyokyaikala kimye kyonsetu kokwa, mukufwanyikizha. Talai pa Ishimela, ne Izaka; kabiji ne bonse panshi, monai, kasa babena kupashang’anya. Talai kwi ngauzhi Mosesa, kabiji monai pe ngauzhi Balamu. Mwamona? Mwamona byo baishile panshi! Monai pe Yudasa, ne kutala pe Yesu.

¹⁴⁶ Kabiji Yesu waambila jimo amba awe Mupashi Wazhila, mu moba akupelo, kikekala ke Katetesho kakwa Lesa. Pano, bushe ng’anyi kintu kyakiyukilo kyalukinyama? Kyakonsha kwikala ke kyakukana aka Katetesho kakwa Lesa. Mambo, byonse byabula Katetesho kakwa Lesa byajinga kiyukilo kya lukinyama. Kabiji umvwe aba kabiji ba bumupashi, umo bakekala kiyukilo kyakine kya kwa Lesa, mukwabo kikekala ke kupondoka. Mwakonsha kwikimona nyi?

¹⁴⁷ Talai pa kiyukilo mu Lulayang’ano Lwakala. Kimye ntolompita byoikajila, ke yubiilee, ke myaka yavula bingi, ba—ba bazha baile kasa bakasuluka mambo akujizha ntolompita. Kyawama, muntu yense wakebelenga kwikala wakasuluka, wakonsha kuya. Bino bamo ba mwi abo, bajinga bazha, nanchi bebatwajile ku kitapisho ne mu kifulo kya kipwilo, kabiji kajinga namatwi ababana na boya. Kabiji babikilwe katetesho kakikupu, kimye kyonsetu bajinga babena kwingijila nkambo yabo.

¹⁴⁸ Kabiji leelo ukomvwa mbila ya Mamboawama pa Bukine, “Pano wakonsha kwikala wakasuluka inge ubena kukeba,” Lesa waamba kwi obewa. Pakuuba umvwe wafika pa kumupaka papo kabiji wabwela watalapo, ne kwikala na maana a Bukine, kabiji wabwela waaluluka, aye wakwanyinyenga ku matwi yanji kabiji anweba kimye kyonse aye wajinga waitabila wamana. Obewa ukekala mupopweshi ne kuya ku kipwilo, bino kechi wakonsha kutambula Mupashi Wazhila ne. Monai, nanchi wangingijila juba jobe jonse. Pano, kiyukilo kya lukinyama, nangwa mba Katetesho kakwa Lesa. Kabiji tubena kufwenya pepi bingi.

¹⁴⁹ Pano, talai, Kyambo kyafwainwa kutundaikwa na mupashi: pa Kwikyumvwa, byo Kiyuka, kabiji ne kwingijilapo pe Akyo.

Bantu bavula bakomvwa, bino kechi Bakonsha kwi kiyuka ne.

Lesu ukamba mba, “Kino kyo kimye kyenu.”

¹⁵⁰ “Amiwa kechi nakonsha kwikala uba kyongo-kyazhila ne. Ami—Ami kechi kebapo nangwa umo pa Kyokyo ne.” Monai, abo kechi Bekituluka ne.

¹⁵¹ Tukaya ku mbung’eno, Mupashi Wazhila mukatampe ukekila panshi. Amiwa naikelenga monkamwa juba jalondejilepo, kimye kyaishile kimonwa ne bikwabotu kabiji ne kwambila jimo kyokakya. Naambile mba, “Awe wiya mwanamulume mwanyike.” “Iyai kuno,” kukwambila kokwa kukichi wita, “anweba mwajinga namuchima wakatazhiwa kabiji ne kwimutala anweba ku...”

“Ee. Abyo kine ibyo.”

¹⁵² “Monai yewa mwanamukazhi kasa abena kwiya kokwa?” “Iya kuno. Uji na kitumbwa ku jibele, kabiji kiji ku jibele ja kipiko, kabiji uji na mwekelo yatama bingi. Kabiji wi ndengamambo kechi...”

“Kine ibyo.”

¹⁵³ Aba banabalume baikala popa, nakeketele kuzhokoloka, basapwishi ne bonsetu, baambile mba, “uu-uu!” Yanga ku mbung’eno, monai Mupashi Wazhila ufumamo mu mbung’eno ne kubulang’ana byafyamika bya mu michima, bintu biji byobya. Ambai mba, “Kyawama. Naketekela. Ee.” Mwamona? Oo, mulongo! Mwamona? Ke—ke—kiji kulubaji lukwabo, pajipo kintu kimo kyamweka. Banabakazhi bakatwajijilatu nakuya, na kuuba kintutu kimo. Bantu bakonsha kubwelatu kunyuma, nobe ngulu ubwela ku mateshi anji kabiji ne kabwa wabwela ku malashila anji, kijitu pamo. Kechi mwikimona nenyi? Pano Mbena kwamba ku en-...aye...

¹⁵⁴ Mwamona, anweba mwatuluka nanchi, balunda, ng’anyi musango yemuji nanji anweba. Ao oene mambo awe tepu, Naambile mba, “Ku kipwilo bunke.” Mwamona? “Akye kipwilo kyonka.” Inge waitwa kufuma mu kyeya...kufuma ku mfishi kuya ku Kyeya, kufuma kulufu kuya ku Bumi; kufuma mu kisho, milanguluko ya bumuntu ya Kilishitu, ne kuya mu byakupitamo byasemwa-jibiji; kabiji ne kutajisha bumi bohe, amba bintu bya muntanda lubaji lumu, kabiji ne kwimana kulubaji lwa Kilishitu, nangwatu kikale byepi; nanchi kintu kimo kyamweka. Mwamona? Mujipo kintu kimo mwi obewa, kibena kufwa nzala ne kwenda, nobe byonka byajinga Yakoba. Mwamona, obewa walwile ne Nkambo, anweba mwenda kyapusanako panyuma yakyokya. Kintu kimo kyapusanako ne anweba, anweba mwampipulwa.

¹⁵⁵ Pano, kiji, kasa kikyanyge kubiwa ne, kyafwainwa kutundaikwanga ne obewa. Amiwa kechi natako muchima ne, Nafwainwa kwimana kuno ne kusapwila poso Naikala

na...ng'anyi suki yo Nafumineko, poso mapuzhi ami atanyikijile panshi kabiji Najinga na myaka naite, kabiji anweba mwatelekele pajuba pajuba; poso Lesa wasangulula anweba, anweba mukijitu monka mumusango umo.

¹⁵⁶ Mooba abiji Nafunjila ne kulomba pa kikyee. Mwamona? Naambile mba, "Nkambo, bushe Nakonsha kwamba kyokyo ku kipwilo nyi?"

¹⁵⁷ Kintu kimo kyaambile mba, "Amba. Kimye kyafwenya ke pepi. Wikyamba." Naketekela mba Aye ukandosela bukiji bukiji, nanchi Na—Nasaka namba anweba mwikiyuka.

¹⁵⁸ "Kafwako muntu nangwa umo wakonsha kwiya kwi Amiwa ne," byo aambile Yesu, "kanatu Ba Taata bamukoka patanshi. Oo, Nayuka wamba mba uji na Lesa kabiji Abulahama, ku bashobe; bino Nemubula kikyee, anweba mwi...shenu diabola," byo byaambile Yesu. Bantu babupopweshi, bang'anga, ne bantu bakatampe, "Anweba mwi bakwa diabola, shenu." Mwamona? Monai, bipangwa bya Mupashi.

¹⁵⁹ Pano, monai, kyafwainwa kusangululwa kwi anweba.

¹⁶⁰ Amiwa kechi nakonsha kulanguluka Nowa kwamba mba, "Mwayuka kine kintu nyi? Kyafwainwa kwikala nobe mvula juba jimo, nanchi Amiwa kafumapo na kushimika bwato. Inge yanonka, kyawama, Amiwa katwela mu bwato ne kuya kwalepa. Kabiji kafwako nangwa kimo kyakonsha kukatazha ne, mambo Amiwa mbena kuya mu bwato ne kufumapo." Bushe mwakonsha kulanguluka nyi? Ine. Ine. Akyo kechi kyajinga ikyo ne. Inge akya kyajinga ikyo...Oo, lekai Basalululwa beyumvwe ponkapano. Inge akya kyakonsha kwikala nakyo, akya kintu kitanshi kyaishile, nobe byaambile Baibolo kyajinga nakyo, kyalubakenye kwi aye, aye wakonsheshe kyaikajikwa ne aye kyakumufumpa ne kwendela monka.

¹⁶¹ Noba bantu byobabena kuba leelo, akya kyatatwilwe kwi Yesu; kabiji inge batalapo ne kumona Bukine, bafumineko ku Kikye. Kechi bakonsha Kwikishinda ne.

¹⁶² Noba byonka byaambile yewa musapwishi kechi, "Ki—kyakonsha konauna mwingilo wami." Amiwa kechi nasakamana mwingilo Mupashi Wazhila ye akonsha konauna ne. Kyajinga kyatabuka kwiulu. Pano, bino, mwamona, ke kwitota, kwa muntu, kwa muntu. Oo, monai mukikye pano.

¹⁶³ Nowa wajinga mubujimi bwanji mumwingilo, kabij aye wauvwine, kabiji aye watulukile, kabiji aye waingijile pa kyokya. Nangwatu mwakonsha kwikala bantu balukankana byepi baiya, aye waishimikile pakyonkakya.

"Nowa, obewa uba kyongo-kyazhila."

¹⁶⁴ "Kechi munkatazhe ami ne nangwa pacheche." Mukushimikila ponkapa! Aye waumvwine. Aye wikipukile

mba ke Lesa, aye wikizhachishe na Binembelo, kabiji kyajinga byonkabyo. Aye washimikile bwato, nangwa kikale byepi.

¹⁶⁵ Mwakonsha kulanguluka, bushe mwakonsha kulanguluka kikye nyi, awa Mosesa, monka mujishinda janji ku Ejipita, waile konkakwa juba jimo kabiji waambile kwi Zipola, na mukazhanji, “Zipola, anweba mwayukanyi? Amiwa nawamushe mwaila kwamba kwamula. Amiwa nanjinga nakintu kyakicheche monka musamushi mwaila kukosa kwami, kabiji kintu kyami kya jometele kabiji, oo, bintu byavula bingi, kabiji kufunda kwami. Kufuma popa Amiwa nailenga kubwela na mukoko kokwa kuno, Amiwa—Amiwa—Amiwa nawamishie monka mu kyokya. Amiwa nalengele kilubo monka mu Ijipita. Naketekela mba Amiwa sakuya konka ne kwikiwamisha. Naketekela mba Amiwa nsakuya konka”? Ine, akya kintashi kyajinga kyakwiimena aye, wakonshe kuvwa byonkabya bulongo.

¹⁶⁶ Kika kintu kyoaubile aye? Aye walubileko abyonsetu byoayukile pa jometeli kabiji ne byamaana pe aye. Kyajinga kintu kimo kyalukatazho kwi aye.

¹⁶⁷ Abyo kipwilo byo kiji leelo, ke basapwishi bavula bafunda bingi kwakubula kusemwa ku Mupashi. Banabalume ne banabakazhi batemwa kuteleka ku maana akufunda, mukifulo kya kusapwila bulume ne lusanguko lwa Yesu Kilishitu. Akyo kyo tuji nakyo mulukatazho leelo. Kechi tubena kukeba masukuulu akatampe ne kufunda basapwishi ne. Tubena kukeba bantu baitwa na-Lesa abo bayulwa na Mupashi Wazhila, kabiji kechi maana a lengwa-ku bantu a dinominesheni ne. Tubena kukeba bantu baitwa na-Lesa.

¹⁶⁸ Mosesa wajinga nakuya na mukoko, waikajile monkamwa kabiji walubileko. Aye wayukile kufunda kwanji kukafweluka. Aye wayukile kyalengejile kukankalwa kwa kufunda kwanji. Kwajinga mikoko yabo, bino aye waumvwine, oo, “Mvula kwabilo yobe, Mosesa, mushiji ye waimanapo pazhila.” Aye watelekele ku kikye. Kyajinga kika? Aja Jiwi awa Malaika waambile mba ke Kyanembwa. Aye walaile Abulahama, bashanji, “Amiwa kebapempula bantu panyuma ya kwikala kuno pa myaka foolo aduleendi, kabiji Amiwa nkebalupulamo na kuboko kwa bulume.” Aye wayukile mba akya kyajinga Kinembelo kya Lesa kyasololwa.

¹⁶⁹ Lekai ngimane pa kamineti kamo. Lekai kikye kitwele. Mwakonsha kumona kyo Mbena kwambapo leelo nyi? Kyambo kya Lesa kyasololwa kwi obewa, kabiji kechi wikivuluka ne. Langulukai pano pa Sodoma ne Gomola; langulukai pa mulaye wakwa Kilishitu mu moba akupele.

¹⁷⁰ Mosesa wikiyukile; kyajinga Kyanembwa, kyajinga ke mulaye. Aye waumvwine, aye wayukile. Kintu kimo kyaishile mwi aye, mulongo, aye wakonsha kuya na kwikyuba nanchi.

Aye waingijile pa kyokya. Aye wakonsha kuya konka ne kuleka byonsetu byakwa Felo. Aye wakonsheshe kuleta byamyalo kimye kyoakebele kwikyuba. Aye wakonsheshe kushikula Kalunga Kachila, mambo waumvwine, aye wayukile mba, ubena kuuba mu kifulo kya kwa Lesa.

“Amiwa kekala Lesa kwi obewa, obewa ukekale ngauzhi kwi Amiwa,” Aye byo aambile.

Kabiji aye waambile mba, “Amiwa kuuba ne kyuba ne.”

¹⁷¹ Aye waambile mba, “Kyawama, nanchi, wikale lesa, kabiji Alona ekale ke ngauzhi obe. Wafwainwa kuya, nangwa byonkabyo.”

¹⁷² Aye kechi waambile mba, “Kyawama, kampe Nafwainwa kuya na kuwamisha bintu.”

¹⁷³ Mwakonsha kulanguluka Elaija pa Mutumba wa Kamela, ne kwamba mba, “Mwayuka, ino ntanda yajinga yatama bingi, kampepo, Nafwainwa kuya na kubuula Ahaba mba aye wakonsha kwiumvwina bumvu aye mwine. Kampepo Nafwainwa kuya kokwa ku mutumba kabiji ne kwikala panshi, kabiji kyajingatu kyabukiji palepa, poso boba bantu baikeleabela kabiji bakoka kasa babena kumona ami kwikala nanzala ne kukeba kumfwa”? Ine. Ine. Akyo kechi kyajinga ikyo ne.

¹⁷⁴ Bino aye waumvwine, kabiji aye watulukile, kabiji waingijile ponka pakyokya. “Nakambizha ba bikwangala bakukujisha. Yanga kokwa, ku Kelita.”

¹⁷⁵ Byo kyafikile kimye kya kubekya pakachi ka Baela ne Lesa, aye waambile mba, “Yanga, ukasende bitapisho byobe, ne kubapo kintu kimo kwi abo kyo ukeba, kabiji ne kwita pe lesa obe.” Byo bechibawilenga abo bene, kabiji bajinga na nyama yavula, ne kutoloka peulu-ne-panshi, pajinga kyongo kikatampe bingi, aye waambile mba, “Bijikishaiko pacheche, kapepo waya, watoloka pantu pamo. Aye wakonsha kwikala walala.” Oo, mulongo!

¹⁷⁶ “Kyawama, mwayuka kine kintu nyi?” Aye waambile mba, “Amiwa ne waitabila mwi Yehoba, nanchi Nakonsha kuuba kikyee, nangwa byonkabyo.” Oo, ine, kechi wakonsha kupashang’anya kyokyo ne. Ine. Kechi weseke kwikala Elaija ne kanatu Lesa wakwita mba ukekaleko. Ee, mwane. “Amiwa ne kalume wakwa Yehoba.” Kuji sebeni aduleendi ba mwiabo kokwa, ne abo, bino kafwako nangwa umo wa mwiabo wikyubile ne.

¹⁷⁷ Pano byo achibile ng’ombe mulume ne kwitulwila meema, waambile mba, “Nkambo, Nauba kikyee ku mukambizho Wenu.” Monai aye...Muntu mukwabo wafwaijilwe kweseka, wafwaijilwe kwikala wakankalwa kupwijijika.

¹⁷⁸ Wajinga wakukutundaika obewa! Awa Mupashi Wazhila ukekileta kyonkakya kabiji ne kwikilengela akya kusololwa kwi obewa.

¹⁷⁹ Alo lolukatazho lujiko leelo. Obewa kechi wakonsha kwimana ne, kitapisho, ne kwamba mba, “Kyawama, Aleluya, Aleluya. Nkambo, Amiwa nakeba Mupashi Wazhila. Aleluya, Aleluya.” Ine.

¹⁸⁰ Bino, mulongo, nyenga, umvwe Mupashi Wazhila washinga manyi kyokya Kyambo kwi obewa, obewa Ukekitambula kasa ukyangye kufuma pa kipona kyobe ne. Kintu kimo mwi obewa kibena kupya. Musapwishi kechi ukemubulapo anweba *abye* ne kabiji ne kuba *kyokya* ne. Aa mabula akaponakotu ine, kabiji mabula akatataka akeya ponka. Kyatundaikwa kwi anweba. Anweba kechi mukazhingila na musapwishi ne byo asapwila Bukine kufuma mu Baibolo. Obewa Ukekitemwa, kufika ne kwi Akyo. Ke Kajo ka ku mweo obe.

¹⁸¹ Ne Yesu, Ayemwine, Aye waambile mba, “Amiwa kechi nguba kyo Mbena kukeba kuuba ne, mwi Amiwa mwine. Aye Mwaana kechi wakonsha kubapo kintu kikwabo ne kanatu kyonka kyo Amona Bashanji kasa booba.” Abya Byambo... Aye wajinga Emanuele, Aye mwine. Aye wajinga Lesa pantanda; Yesu byo ajinga. Aye wajinga mubiji wanyama ne Lesa ye aikelemo. Aye wajinga tente Lesa ye aikelemo. Amena. Bino mu byonse byo, Mwaana wasemwa-mukisungu wakwa Lesa, Emanuele mu kuyula konse kwa Mupashi, Aye wajinga na Mupashi kwakubula kipimo ne. Kabiji, nangwa byonkabyo, mu mubiji Wanji Mwine, Aye waambile mba, “Amiwa kechi nguba kintu nangwa kimo ne kana patanshi Bataata bamweshwa Amiwa.” Kyatundaikwa na mambo a Aye, amba ekyube!

¹⁸² Satana waambile mba, “Alula ao mabwe ke shinkwa, ne kuuba kyakukumya. Lekai ne mumone Anweba mwikyube.”

¹⁸³ Aye waambile mba, “Kyanembwa mba, ‘Muntu kechi ukekelatu ku kajo konka ne.’” Oo, ami! Pakuuba jibumba byo jayilenga na nzala, Aye watolele tubashinkwa faivi ne masabi abiji, kabiji ne kujisha faivi sauzande. Oo, Aleluya! Mwamona mo Nekitazha nyi?

¹⁸⁴ Kechi mweseke kupashang’anya ne. Alo lolukatazho luji na ba Pentekositi leelo. Alo lolukatazho luji na kipwilo leelo, kuji bavula bingi babena kweseka kupashang’anya mba baji na Mupashi Wazhila. Kuji bavula bingi babena kweseka kupashang’anya lubuko lwa Bulesa. Kuji bavula beseka ku pashang’anya bintu byapusana na Nkambo. Kuuba wauba kyokyo ne. Abya bintu biiya kupichila mu kusalululwa, Lesa ubena kwita, obewa wafumamo mu munda mu bamaama na byobya. “Byabupe ne byalwito bikalako pabula ne lulapilo ne.” Oo, ami! Akyo kyakine. Kechi wakonsha kwilenga obewa mwine kwikala kintu kyo wabula ne.

¹⁸⁵ Bino inge Lesa wakwita, obewa yobe muntu wakila bingi mukusata pa ntanda mambo Aye wakwita. Nanchi po kikala kituntulu kwi obewa.

¹⁸⁶ Nobe byo Nakonsha kwamba, inge Najinga na kimye, pa baluyeye juba jikwabo, pepi pakuuba mba mbule kwikyuba. Amiwa kechi ne kimwenepo kala ne, kabiji kechi Nakonsha kwikyuba ne. Hattie, waikala kunyuma kookwa na nkutala. Akyo kyakonsha kumweka byepi? Kechi kyafwaijilwe kubiwa ne, bino kyajinga kyatundaikilwe, kusangululwa. Akya Kyambo kyaambiwe kabiji kyaubiwe. Aleluya!

¹⁸⁷ Paulo, mwakonsha ku mufwanyikizha kwamba mba, “Amiwa najinga pa kalunga pa moba fotiini ne mafuku, kabiji kafwako tubaangabanga nangwa ng’ondo, nangwa juba ne nangwa kafwako. Naketekela mba Amiwa sakuyakotu ne kwibabuula mba, ‘Ke lutundaiko lwawama, mambo Lesa usa kwitulama, nangwa byonkabyo’”? Oo, Lesa kechi wingila byobyoye ne. Lesa kechi uba kyokyo ne.

¹⁸⁸ Lwitabile lwenu lujitu bulongo, mulongo. Lwitabile lwenu lwawama. Bino kasa akya kintu kimutundaika anweba!

¹⁸⁹ Oo, apo popanji kyeya kichila kibena kusama kyakobekwa byobyoye, kabiji inge Amiwa nekimona. . . Amiwa nkaamba mba, “Kyawama, Amiwa njinakyo kumaulu ami yaakisaleta. Amiwa njina motoka. Nakonsha kupita mu kyokya kyeya, kwikala aduleendi tweti mailoshi pa awala umo.” Akyo kyakine. “Nakonsha kumvwa bulume panshi ya maulu ami.” Bino kyawama kupembelela poso “kuya” kiyukilo. Aleluya!

¹⁹⁰ Bushe mwaumvwa Amiwa mo nekitazha nyi? [Kipwilo kyaamba mba, “Amena.”—Waku.] Inge kiyukilo kyatwajijila, kijitu bulongo. Umvwe kintu kyatundaikwa kwi obewa, kabiji Lesa wamulengela kuyukanyikwa nobe byonka byo Aubile kunyuma kokwa, kijitu bulongo. Bino poso Aye wikyuba, atweba tuji na jibumba jabena Yuda babena kufwanyikizha, kwenda kuya kulutwe nobe, kwamba mba, “Kyawama, Amiwa jitu pamo nobe byonka byo baji. Amiwa ne Mwinakilishitu, ne amiwa.”

¹⁹¹ Oo, kechi mwavuluka nenyi? Baana ba Waishile, waile na kwamba mba, “Twakupanga, twakupanga mu Jizhina ja Yesu ao Paulo ye asapwila. Fumamo!”

Aye waambile mba, “Paulo Nayuka, kabiji Yesu Nayuka, pano obewa yobe ng’anyi?”

¹⁹² Awaala ubena kwiya kimye akya kyeya ne kyatama pobikasolokwa. Kikamweshwa mwine Mwinekilishitu waleelo. Kikamweshwa kiine kipwilo kyaleelo. Kikamweshwa bantu beene baleelo. Amiwa mbekwimubazha bingi; Amiwa nakeba mba anweba mwibiyuke abyee.

¹⁹³ Paulo kechi waambile mba, “Naketekela mba Amiwa sakuyakotu ne kwamba mba, ‘Kyawama, wikale lutundaiko lwawama.’” Ine.

¹⁹⁴ Waubile byepi? Aye waumvwine Malaika. Aye wayukile mba awa wajinga Malaika umo kimye kyonse waambile kwi aye. Aye watulukikile, nanchi aye waingijile pakyonkakya. Waile kabiji ne kwaamba mba, “Ikala wachichika. Mambo Malaika wa Nkambo, Ao waikala Amiwa wamwingilo waji, waimene ne ami bukusu bwapita, mukumweshwa ami akya kimwesho akyo amiwa kafwaiko nangwa kintu kimo kyakonsheshe kutaika ne, mububwe bwa. Ikala wachichika. Yaanga ukaje kajo kamute wamabanga pano. Bintu byonse bijitu bulongo.” Amena. Umvwe ya shingwa manyi kwi obewa, inge Lesa wikilenga kwikala bulongo!

¹⁹⁵ Amiwa njinabyambo byakwamba pakikye kuno, Amiwa najinga nakyanemba papo. Pano kiji bino. Uu-uu. Tuji ku mpelo ya bintu byonse. Lekai ndete kikye muyuwe musango, mu kupezhako. Naketekela mba Lesa wakusolwelapo kintu kimo. Talai. Bintu byonse biji kumpelo. Muntu umo waimpwizhe bifuku bukwabo, Naketekela mba kyajinga Mulongo Fred Sothmann, twaipwizhenga bya mpelo ya kimye.

¹⁹⁶ Mulongo Demos Shakarian wamwene akya kimonwa kyasololwa, kabiji kyailshile nakufikizhiwa pamoba faivi palutwe, kukyalumbuluka, kyajinga kyapona kwi aye monka musapato yaji. Aye wangichile amiwa. Aye waambile mba, “Nga Yosefwa uji byepi?”

Naambile mba, “Kijitu bulongo.”

Waambile mba, “Bushe umona bimwesho nyi?”

¹⁹⁷ Naambile mba, “Ee. Aye wambujile Davida, mwaana wakwa Mulongo Wood, amo mo apopejile pa mashinyi, fiili nangwa foolo kasa kikyanyge kumweka ne, byokijitu.”

Aye waambile mba, “Mwayukatu, abye bintu bilondela bisemi.”

¹⁹⁸ Naambile mba, “Bololoke nangwa kyatama, kyubiwa, nangwatu kimo. Kilondela abya bisemi.”

¹⁹⁹ Kabiji twaambilenga pacheche, kabiji abo, Fred waambile kwi amiwa mba, “Akye kyafuma kwepi, Mulongo Branham?”

²⁰⁰ Naambile mba, “Talai, Fred, twayai twikisende mwaila kisemwa. Lesa ubena kwingila mu musango Waji. Talai, monai kyamwekele. Juba jasamine ku Musela. Akya kyajinga kyabintu byakala saana byayukwanyikwa byotuji nabyo atweba, ke China.” Atweba bonse twikiyuka kyo.

²⁰¹ Ke kyokya kyabintu bipya kyotuji nabyo atwe ke China. Kijitu bulongo. Kabiji bintu bipya kufumina kumuzhika kwenda kwalepa. Kabiji pano anweba mwakonsha kwikisha byepi inge anweba mwikisha kufuma ku West Coast, kuya konka

kubushiya? Ne kuya ku China. Byonkabyo. Tuji kumpelo. Aye Baibolo waamba mba, ngauzhi waambile mba, “Kukekala juba ajo jikabula kwikala bufuku nangwa mute ne, juba kasa jikyangye kuzhika ne, pakuuba mukimye kya mabaanga,” kasa kikyangye kupwa ne kuno, “nejikwabo akya kikekala ke Kyeya, kimotu.” Yesu waambile mba, “Kukekala mvula mutanshi ne mvula wakupelako. Kabiji mvula wakupelako ukaleta mvula mutanshi ne wapelako, mukimye kimo.” Tuji mukimye kya kumpelo.

²⁰² Talai kuno, lekai ne mumweshe. Mapolitikisi aji kumpelo. Bushe mwaketekela kyokyo nyi? Mbulaipo kintu kimo leelo...

Akya kyalo kekyakila mukutama pa ntanda yonse, ke byamazhika kanwa, nekubula bulesa. Ao watangilenga kipepala yakwa Courier Journala abwa bufuku, mu Louisville, kimye bonse baana bakazhi, kutola, kyaalo kiji kyonse, mwanamukazhi wakila kulamba mu kyaalo, kabiji ne kwimana ku Miss Universe? Muntu yense wikyubile bino Russia. Kabiji batumenye ku Khrushchev kabiji ne kumwipuzha, “Kika kyo kyaikela byobyo?” Aye waambile mba, “Russia kechi wapangile banabakazhi babo ne, kwenda kumeso a bantu ne.” Ba muntanda, kyalo kyabula bulesa kibena kuleta mwenga pe atweba twitela atweba bene amba twibena Kilishitu, waambile mba, “Russia kechi upanga banabakazhi babo ne, pa kwenda byobya ne. Kabiji kechi mumona tuputula nangwa kintu kyayewa musango mu Russia ne.” Abyo ke bya bulesa. Kabiji atweba twitela atweba bene mba “Benakilishitu!”

²⁰³ Kechi kyakukumya ne kyaambijile Baibolo mba, “Kila tebulu waaluka ke wayula na malashila. Kabiji ng’anyi ye Nakonsha kufujisha Lufunjisho, kabiji ne ng’anyi wapainwe ku jibele? Bino kisopelo ukeya pa kisopelo, ne ndonda pa ndonda. Kabiji Amiwa nkamba ku baabo bantu na kikukuma ne na njimi ingi. Kabiji akwe ko Kukokoloka. Pa byonse bye, kechi bakonsha kumvwa ne.” Tuji na maana a bumuntu bwetu. Oo, kyakonsha kwikala kyawama bingi pa Kikye.

²⁰⁴ Bumulwila ntanda, bwabola! Democrats, Republicans, ne bonse, banji na panshi-peene. Kyokika? Ke jibumbatu ja bantu bajimuka. Muntu yense wingijila mu kikye, ao wabula kusemwa jibiji, ke wakwa diabola. Awa satana waambile mba, “Bufumu bonse bwapantanda bobwami,” kabiji Yesu kechi wapachikilepo aye ne. Ntanda itangijilwa na diabola. Kabiji muntu yense wingila ku kafulumende, inge kechi Mwinakilishitu ne, aye ke wakwa diabola kabiji ne kwingila kwa diabola. Abye byaalo byonse bikapona kwi Yesu Kilishitu inge Aye waiya, kukekala Myaka kiumbi kimo.

²⁰⁵ Talai kuno leelo, kibena kubiwa ponkapano. Mukubijika pe ami nambo akutaya mali kubyobya byabwina Kilishitu, kabiji babena kukeba kumpa amiwa myaka tweti mukaleya, na

kutaya mali mu kwingila ng'endo ya bupopweshi. Kabiji wisiki ne malwa ne byafwanka byanembwa na malyoni yamadola pa mwaka, mukongola kyalo. Kabiji amiwa kweseka kusapwila bololoke, kasa naimana pa kibelo kya Yesu Kilishitu, ne kutuma ku lulapilo lwabo. Kabiji ne kusenda bintu biju byo bya byatama, byabwela panshi-peene, bujumuku, kabiji lekai abo bekinembe ponka pamitanchi ya pa matelevizhonyi akongola ntanda, ne kutuma baanabakazhi ku bakabwa. Amo malingo akatampe akyokya kyalo kyajinga, kabiji bajinga nakyu. Bantumi ami ku penitentiary na kusapwila Mamboawama, mukutwala mandola acheche kokwa kuno na—na kusapwila Mamboawama, aabo bantu bo baapa kusapwila Mamboawama pamo. Amiwa kechi ne munoshi ne kabiji Amiwa kechi nakonsha kunemba kyokyo ne. Bino kasa babena kukeba ami kuntuma ku penitentiary, ne kungikazha ami pa myaka ibiji, kabiji ne kuya mulweseko katatakatu. Oo, bushe bushe-panshi, bushe kekyatama! Lesa, etubile lusa.

206 Amiwa nsakwamba kikye kintu kimo, kampepo ajo jo jishinda Lesa jo akebelamo atomiki mbomba kasa akyangye kutuma. Obewa wafwainwa kubapo kintu kimo kyatama, mwayukatu. Anweba mwafwainwa kukwatako kukushingwa manyi kwanji kimye kimo, namambo akikye Kinembelo, kukwe na... "Kukwatako ku Bakwami Basalululwa ne." Abo kijitu bulongo. Nanchi inge kyafwainwa kusenda kyokyo mu kuleta luzhachisho, nobe byonka byo kyajinga mu moba akwa Danyela nangwa kuntu kukwabo, lekai kiye. Amiwa ne kalume Wenu, Nkambo. Abo ibyo. Oo, ee.

207 Byamulwila ntanda, byabwela-panshi! Kyalo, bubole! Kyawama, talai kika! Basakuya ne kubika bashilika babo mutuputula pano. Oo, ami! Byamulwila ntanda, kondo! Byamulwila ntanda byafika kumpelo. Bankanjikizhi ke batama. Bumulwila ntanda bwabo bwaya mungi. Kika kyo baikela na mfumu wa bulesu nobe Lesa byo ebapele, Davida? Aye nkambo mukatampe wa mu England waambile mba, kimye awe—awe ndimosa byo alengele, waamba mba, "Kijitu bulongo pano, bino kikeya mukimye kyakyo," aye waambile mba, "kechi kikekala kintu ne. Kikekalatu kekyabula kintu kabiji kyabulwa kwikajikwa." Kabiji aye wajingatu bulongo. Waambile mba, "Bumulwila ntanda bwaimenatu pabibokoshi byasopo byabikwa ku kona, ne bintu byonsetu byakukayisha byakongolo kafulumende." Kabiji awa muntu wajingatu bulongo. Monkatu mouyila.

208 Muntu umo wakonsha kuyako, na kupita mumwe kabiji ne kutoma, ne konauna bintu byonse byo akeba; kabiji yainga kokwa, aye wayuka muntu yense, nanchi kafwako nangwa kimo kyakwambapo ne. Lekai awa muntu wayanda, nangwa muntu wabula kuyukapo kintu ne, eseke ne kuba kyokyo, kabiji abo bebatumine ku penitentiary. Byamazhikakanwa, byakepa-

byapashi, byatama, foote pesenti bya musango wakwisongola mulwabo. Ingikilangulukaipo kyokyo, Sondoma ne Ngomola jikwabo! Kuji jibumba, bafwainwa kwikala bapopweshi.

²⁰⁹ Na—Nakumya kana kika kyamwekele, kimye Ndamakyaalo wabubiji ubena kwiya? Lesa witupele muntu wawama wabulesa, mukulumpe Dwight Eisenhower. Kabiji pano Amiwa njina-... Monai kintu kyalondelapo kyaiya. Kabiji twakonsha kwikala nampuku ne kimye kikwabo, kiine byavula. Bino kubena kwiya, “Felo wabula kuyuka Yosefwa.” Vulukai kyokyo. Amiwa sakuya kukyokya pa sekondi umo. Bumulwila ntanda bwabola. Twayuka kyokyo.

²¹⁰ Nkondo iji konka ku mpelo yakyo. Oo, ibena kupona kimye kimo pa kikwabo, kwipuma umo nemukwabo konka kumutwe na mabwe ne tutemo, nanchi batailenga mafumo ne miketo. Nanchi bajinga na malaifo, nanchi ke mashinyi amata, nanchi ke eite-eite mu Germany, kabiji ne mata akatampe ne atweba. Nanchi batailenga mfundanga ne mulemo bwabwishi namaboko abo. Bino bajinga na mizhinga ya mambomba amwela pano. Nkomdo ke kumpelo. Kyaalo kyonse kiji nabyo, nanchi pano musa kuuba byepi? Nangwatu kakyalo kakacheche leelo, kakonsha kuleta bulemo lwatama, abyo byonka byobauba abo, kabiji bonsetu ke kuya konka. Nkondo iji kumpelo. Uu! Amena. Nkondo iji koka kumpelo. Mapolitikisi iji kumpelo.

²¹¹ Kufunda kuji kumpelo. Kumanyikwa kwabana babacheche kuji kumpelo. Baana, kechi kujipo luketekelo lwa baana ne, baya mubukonye. Anweba kechi mwakonsha kwikala na kufunda ne. Anweba kechi mwakonsha kuya kuno ku sukuulu na kwikala, ne kusenda mwaana wakufunda ne. Aye ke—aye ke mwana waikajikwa konka kungeena kimye aye kyoaile kokwa kukila kimye aye kyoaile. Lekai mufunjishi ambepo kintu kimo pa kikyeye, aye ukepaya. Bakalenga kintu kicheche kiji nobe Klux kabiji ne kuya kokwa ne kuloza mufujishi, kufumyapo aye ne kumubika konkakwa. Atweba twataile bafujishi tuu sauzande. Oo, pembelelaiko ka mineti, Amiwa naketekela kyajinga bafujishi twenti sauzande, awe mwaka wapwa. Amiwa kechi mbena kwibazhachisha ne. Amiwa kechi nakonsha kukeba kwikyuba ne, nangwa pachechetu ne. Pano banji na biyukilo bya kimye kyonse, “Banai kufunda kwa kukoleji kubabo bana babacheche.” Bekikeba, pakuuba diabola uji nabo. Diabola uji nabo. Kabiji kechi kijitu bulongo kuya kokwa ne kwikilumbula kabiji—kabiji—kabiji kitolai ne kwikikobeka kukichi pa Kyakusangalala kya bufuku, nangwa kuuba kintu kimo kicheche kiji nobe baana byo baikalanga, nangwatu kutola lubaji lwa njimi ne kwikajika monka mumukwakwa, kechi nobe byobya ne; bino banji mu kyabunya. Boba bintu byabunya; ne kwimuloza anweba, kwimwipaya anweba, kwimutapa anweba, kwimuba bulemo anweba, kiji kyonsetu. Akyo kyokisemi kikwabo.

212 Kusemwa kwabaana kuji kumpelo, abwabwana bukazhi, abwabusemi. Kika, kukepeshako kusema kubena kubiwa konse konse, kabiji bakabwa babacheche bobatola kifulo.

213 Byubilo byatama, kechi mujipo byubilo byawama ne. Banabakzhi, vwajilo yatama; kwiya kupichila muma televizhonyi, kabiji yonse musango wabyakufwanyikizha bya tama byabantu bamu Hollywood, misango yonse yatutambala. Byonsetu biju kumpelo!

214 Kufunda ke kimye kya kumpelo. Mapolitikisi pampelo. Nkondo iji kumpelo. Lupipu lwa bwikalo bwa bantu luji kumpelo. Byonse bye bintu biju kumpelo. Ami, pano twakonsha kuuba byepi? Kika kyalondelapo? Tuji ku mpelo ya bintu byonse.

215 Pano bumi bwa kipwilo buji pa mpelo, kipwilo buji bulongo, kipwilo. Pano, akye kyakonsha kulamachila pacheche, bino kipwilo kya buntunshi, kipwilo kya Isao, waiya kumpelo yanji. Kika aye kyoasakuba nyi? Kuya monka mukimye kya kyabipwilo, akyo kiine kikapelako kutwela monka muubena Loma, mukulwisha Bukatolika... nangwa kya Bukatolika kulwisha komunizimu. Papa John ubena kwita bipwilo byonsetu kubwela jibiji, kabiji abo bakekyuba. Kabiji bakakwatakana pamo abo bene, monkatu mwaambila ABYO BYOBYAAMBA AYE NKAMBO.

216 Mwaamba mba, “Pembelako kamineti kamo, Mulongo Branham. Obewa ubena kufuma mundonda.” Inge Amiwa, Lesa wanembele Baibolo Wanji mundonda. Obewa wafwainwa kwikala Mikaya, pa ao mambo.

217 Morris Cerullo waambile kwi ami ne mukwabo abwa bufuku, waambile mba, “Uji kwepi antikilishitu, Mulongo Branham? Aye Muyudeya ke antikilishitu.”

Naambile mba “Morris! Kabiji anweba, wi Muyudeya nyi?”

Aye waambile mba, “Abo ke kintu kikatampe kyapata-Lesa akya kokiji.”

218 Naambile mba, “Morris, kechi! Mbulepo ami akyo kulinembelo akwa kwafumine awa antikilishitu waku Yelusalema. Aye antikilishitu wafumine ku Loma, kechi wafumine mu Palasitani ne.”

Aye waambile mba, “Kyawama, talai, Amiwa... Abo ke kisochi kya Lesa-kisochi.”

219 “Ee, Lesa kechi waambile mba Aye wibampofwele meso abo pakuuba mba twikale na juba jakumona? Pakuuba juba jetu kikobiwa katatakatu.”

220 Aye waambile mba, “Oo, Mulongo Branham, Amiwa kechi nalangulukilepo pa kyokyo ne.” Monai, byobyo kiji.

221 Monai, tuji kupelo. Ntanda ya buntunshi, kipwilo kya buntunshi kijitu pe akyo, mpelo. Monai byo kibena kuya

nakubungizhiwa mu bipwilo. United Brethren baile monka mwi abo. Ba Pentekosito baji mukyonkakya. Bonsetu bashala batweshu mukyonkakya abobene. Kwimumona anwebu kokwa, abo Benakenana, kuyatu ne kufika monka mumupashi wakwa Isao, yenka mupopweshi, kabiji nekwibika abobene mu byonsetu bya ntanda; kechi mupashi wakukwantakanya ne, kechi wakonsha kushinda ne, kech wasalululwa kwi Lesa ne, mukwitwa kwakokwa ne kwabanwa ne.

²²² Oo, inge Nakonsha kwikyuba, inge Nakonsha kwikikajika mujishinda jimo! Abo kechi bekimona ne. Baji na meso kabiji kechi bakonsha kumona ne, matwi kabiji kechi bakonsha kumwisha ne. Oo, kika kyo twatwelelwa mu Mupashi? Pano, telekai ku kiky. Bintu byonse biji kumpelo.

²²³ Kabiji Kipwilo kya bumupashi kiji ku mpelo Yakyo. Kibena kwiya ku mpelo. Anwebu Lesa! Talai kunyuma kokwa byo Atatwile ne Luther, basukene kokwa, wa bumupashi. Nanchi ne Wesley, waishile na kutokeshiwa. Nanchi na Pentekosito, Mupashi Wazhila. Kabiji pano mu kimye kya kumpelo, Mupashi wa Kilishitu nanchi mu Kipwilo, Ubena kuuba mingilo imo yonka yo Aubilepo, kubwela jibiji ku Mutwe Wanji; winengezha ku Kipwilo ne Kilishitu kukwatakana, kabiji ne Kwiya kwa Nkambo Yesu, kabiji ne lusanguko lwa bafu. Tuji mu kimye kya kumpelo. Yesu waambile byobyo, “Byonka byo kyajinga mu moba a Sodoma, nanchi byobyo kikekala ne pakwiya kwa Mwaana muntu.” Mwikyumvwa nyi?

²²⁴ Talai pa kipwilo kya buntunshi. Talai ko babena kuya, kulutwe ne kulutwe.

²²⁵ Talai pa kyokya Kipwilo kyayuzhiwa-Namupashi, kusunkenya byonsetu bicheche Kebyabula maana, kwiya mu Mupashi, (mu bacheche, nangwa byonkabyo), kwiya mu Mupashi, bino kekwenenda monka pakyokya kifulo poso Kyakutwala monka mubena kwendela Mupashi Wazhila mukwenenda Nakyo bulongo monka, kwingila mujishinda Janji, winengezha ku mutambula Nkambo Yanji, winengezha ku Mutambula Nkambo.

²²⁶ Kabiji bonse bashala baletele pamo, mukuya monka muntanda, kulubaji lukwabo, kubwela jibiji mukyonkakya kintu kimo, kwendela mukyokya kikatampe kyakwantakanya mutwe wa Katolika. “Kabiji kwajinga kipashang’ano kyalengelwe kya lukinyama.” *Akya kipashang’ano*, “kyapashako byobyo.” Kabungwe ka kipwilo kalenga pamo na Bukatolika, aba babiji pamo, bengila pamo. “Ng’anyi wakonsha kulwa na lukinyama nangwa kipasha kyanji?” Kechi ibyo ne. Twakonsha kupita byepi mu ma awala!

²²⁷ Pano lekai ng’ambe kiky kwi anwebu, kabiji nanchi kikekala kimye kya kushika. Kiji Na...Nemubuujiile mba kikekala kimye kyabaya. Amiwa—Amiwa ne kyumvwa bibi.

Kimye Lesa kyo aambile bibye bintu, waambile mba, “Babuulai. Ambaitu. Kechi utwajijile na kuzhindama ne. Kimweshai Akya kwi abo. Inge babula Kwikitambula, nanchi mashi abo kechi akekala kumabo enu ne.” Kimye kyafika. Kimye, byonse bibena kupwilakena pamo.

²²⁸ Ntanda iji kumpelo yayo. Kechi yakonsha kutwajijila ne. Nkondo iji ku mpelo yakyo. Obewa kechi wakonsha kwikala na nkondo ne. Inge obewa uji na nkondo, kechi kikobiwa ne; ke kikoka kitanshi kibileta, akyo ikyo. Byabumulwila ntanda, byobola ne bubole.

²²⁹ Akyo kipwilo kya ntanda ke ba Methodist, Baptist, Presbyterian, Pentekosito. “Ke bangulu ku malashila anji, bakabwa ku malashila anji.” Abyo ibyo, bonsetu! Lesa wita, kufuma mu bobwa bubole, Kipwilo kyasalululwa. Abyo kine ibyo. Isao, baambile mba, “Atweba twi kipwilo!” Amiwa kechi nashinauka kyokyo ne. Yakoba wajinga shanji, ne aye, abyo ibyo, nanchi bino—bino... Natazha mukuuba mba, Izaka wajinga taata wa Isao, kabiji Yakoba wajinga mulongo wani, nanji. Bino umo wajinga wakebesha abwa bubeji; awa mukwabo wikishikilwe. Mutwe umo, watulukile, kabiji ne kwingijila ponka. Mukwabo waambile mba, “Oo, kikulu Naya ku kipwilo kabiji sakuuba kintu kiji bulongo, ng’anyi lupusano lujipo?” Abyo byobyo kiji. Pano mu... .

²³⁰ Naamba kikye pano, pa kupezhako, ino ng’ambilo ikwabo. Akyo kine Kipwilo kiji na bumi bwavula bingi pa kino kimye. Oo, kyafwainwa kwikala kimye kyabaya-bingi kya Kipwilo kitutulu, kya Kipwilo kya kine, kya Kipwilo kyasalululwa, inge wayuka mu muchima obe wapitaila kufuma kulufu kuya ku Bumi; inge watala pe obewa mwine ne kumona, monai bumi boke kabiji ne kumona mba bintu byonse bya muntanda byaya, kya kuuba mba mwaikala ke kilengwa kipya. Telekai pano, mu kupezhako, pepi bulongo. Mwayuka mba anweba mwapitaila, bumi bwenu bushinikisha, “Konka ku bipangwa byabo ko mukebayukila.” Kyosetu ke Kilishitu. Mubena kumupembelela Aye kwiya pa mineti uji yense. Obewa twendela mu Mupashi. Anweba mwamutemwa Aye. Mwamumona Aye na kwingila mwi obewa. Kafwako kyo mukeba kuuba ne, bino Aye wikyubatu, Ayemwine. Oo, ke kimye kyawama bingi!

²³¹ Kyamvulula sendwe ubasa waile ku Loma, na kufunda kwikala sendwe ubasa, mulunda mwanyike. Abo bamumwene. Aye wajinga wapusanako bingi ku bonse bakwabo bansongwalume ne bansongwakazhi bena America, kabiji bintu byaile kokwa kubya busendwe wabyakubasa, kabiji ne kufuma kyobyonsetu byashala bya muntanda. Awe mwanamulume mwanyike wajinga walamba bingi. Aye wajinga mulongo wawama, kabiji bamwene. Biji na bijiilo bikatampe, kabiji waya kokwa ne, byonka byo booba mu Loma, kutomatu byonka byo bakonsha kwikala.

²³² Nafikako, amiwa mwine, kabiji ne bamwene. Twalupuka mu mukwakwa, banabalume ne banabakazhi, kabiji ne kutwajijila. Pamotu ne mumapaka, mwikala byakusambakana monkamwa mupaka, monka mwakipeze, kwafwako nekutako muchima ne; England, ne abo, bonsetu bashala. Mwamona? Akyo kechi kyakila mukutama ne kukila pa kuno ne. Ke kintu kimo kuno, akyo kyonka kyatama; kyonkatu, ke kwikizhikatu ponkapa pachechetu kuno, mwailatu ndonda yabakapokola ne bintu. Pano, bino ke bintu byakatazhatu!

²³³ Kyawama, awe mulunda umo mwanyike, aye wilamine ayemwine kufuma kubyonsetu bibye. Kimye kyo baile kubila byabo, aye wibalekelenga baya, bino aye wafujilenga byabusendwe wabyakubasa. Nanchi, juba jimo awa kalama mukote, ao wajinga Mwinakilishitu awa wajinga konka ku—ku muziyamu, wakwa kwabusendwe, aye waambile mba—aye waambile mba, “Twayai tutoole pacheche, mwaana. Twayai tutole jishinda, Nasaka kwisamba nobe pa kimye kicheche.”

Aye waambile mba, “Kijitu bulongo.”

²³⁴ Nanchi baile, na kwenda kuya peulu ya katumba, kabiji bonse babiji bajinga na maboko abo kunyuma, baendele kuya peulu ya katumbatumba. Juba jailenga na kuzhika. Kabiji nanchi awa mwanamulume mukote waambile ku sendwe ubasa, waambile mba, “Mwaana, obewa wi mwina America.”

Aye waambile mba, “Amiwa yami iye.”

²³⁵ Aye waambile mba, “Iyai kuno mu mutambule kufunda kwenu mu busendwe. Amiwa naketekela mba anweba mubena kwikikajika mubumi bwenu kwingila byabusendwe.”

Aye waambile mba, “Mbena kukeba kuba kyokyo, mwane.”

Waambile mba, “Nayuka mba anweba mwi Benakilishitu.”

Aye waambile mba, “Amiwa ne Mwinakilishitu.”

²³⁶ Aye waambile mba, “Kyawama, paji kintu kimo kyo Nakonsha kutemwa kukwipuzha. Amiwa na kwimpuzha babo bakwabo. Baamba mba Benakilishitu, ne abo.” Aye waambile mba, “Kika kikulengela kwikala wapusanako? Kika kikulengela kwikala bapusanako na bonse bansongwalume ba mu America, kabiji ne baabo bansongwakazhi bafuma mu America? Kika kikulengela kwikala nalupusano lwabaya bingi, nangwa byonkabyo anweba bonse mwaamba mba anweba mwi ‘Benakilishitu?’”

Aye waambile mba, “Mwane, mwamona juba byo jibena kwikala?”

Aye waambile mba, “Amiwa ne kyuba.”

²³⁷ Aye waambile mba, “Jishinda ja kuya kukalunga kameema, amwa monka mukyalo kya New England, monka mumuzhi wamukyokya kyalo, kabiji mu nzubo imo mu yewa muzhi,

muji nsongwakazhi umo ao ye Nalaile mba Ukekala na bumi wakishika.” Aye waambile mba, “Abyo byo byonka biji mumilanguluko yami, pakuuba mba tambule kufunda kwami kwa bumuntu kabiji ne kubwela ku yewa nsongwakazhi waikala wakishika kwi amiwa.” Aye waambile mba, “Ajo jo jishinda Amiwa jo ngikalamo byo Nguba.”

²³⁸ Oo, mulongo, nyenga, wakonsha kukumya kana kechi twasakamana byo betutela ne. Amiwa kechi natako muchima ku byo baamba ne.

²³⁹ Naimene ne Fred juba jikwabo, ku San Juan, Puerto Rico, watajilenga pa kalunga, kabiji monai kokwa, awa jibula ja kola, ke kichika kyamamailoshi, aa manyaki akatampe abena kuchibauka. Aye waambile mba . . . Wendesha kuzhokoloka mu bujimi, ne bikwabotu. Naambile mba . . . Aye waambile mba, “Mulongo Branham, akye kijitu pamo nobe Mwiulu.”

²⁴⁰ Naambile mba, “Bino kalunga kazhindama kokwa, mulongo.” Naambile mba, “Kubushiyatu bwa kalunga, kuji kifulo kimo kyatelwa mba Mwiulu, kuji Umo watelwa mba Yesu, Mwiulu, amba juba jimo Aye wafumisheko bubi bwami bonse. Kabiji Namulaile mba Amiwa kekala wakishika kwi Aye, Nakonsha kuuba bintu byo Akebele mba ngube. Ao oene mambo o Nabujila kumvwa bumvu na Mamboawama Anji, Ke Bulume bwakwa Lesa bwa lupulukilo.” Akyo kyo kilengela Mwinakilishitu kwikala wapusanako. Aye wapusanako mambo uji na kintu kimo kyakwikela wapusanako.

Twayai tukunyiike mitwe yetu pa kakimye kacheche.

²⁴¹ Bakwetu bami bankana, lukeelo luno, bushe anweba mujipo nakintu kimo kypapusanako kya kwikala na bumi, kintu kimo kyakwimufumya anweba muntanda, kintu kimo kyalumbulula byavula kwi anweba kukila ntanda, ke kwikela namambo a Kilishitu? Inge kechi uji na kyokyo ne, kika kyo wabujila Kwikitambula ponkapano. Kechi muye ku kipwilo na kwamba mba, “Nasaka kwikala muntu wawama ne.” Kechi mube kyokyo ne. Mubena kukeba kwikala Mwinakilishitu. Anweba, inge pajipo kintu kimo mu muchima obe, wakubuula mba, “Obewa kechi uji bulongo ne, bino Nakeba mba obewa wikale bulongo.” Obewa kimye kyonse usaka kwikala musango umo ye wabulamo pano, kechi wayuka mba Lesa ubena kukwita ne? Kechi muvundamineko nyuma yobe pa kikyene. “Kampepo inge anweba mwajinga mwibikoseshako ne kwikala najishuko, ne kwaluluka kukyokya mukimye kypita, kechi kwakishala kitapisho kikwabo kya bubi ne.” Kechi musende Isao ne.

²⁴² Iyai na Yakoba, nangwatu kikale byepi . . . nangwatu kikale byepi kyabyepi. Inge kimulengejile anweba kutaya mali avula panzubo yenu, inge kimulengejile anweba kwingila kyakosa pa kinto yenu, inge anweba kimulengejile anweba bamwatawenu, kyalengejile mwina kwenu, inge kipotwa baana benu, inge paji

kintu kimo, mwatambula bubeji! Akyo kyo kibalwa. Kabiji inge ubena kumvwa byobyo, lukeelo luno, kabiji wafwainwa kutemwa kwikala na bubwe bubeji! Amiwa kechi nakonsha kwikipana kwi anweba ne. Lesa wakonsha, kabiji Aye Iye ubena kwamba kwi obewa. Mwakonsha kusutulako kuboko kobe, ne kwamba mba, “Ndombelelaiko, Mulongo Branham. Awa bubeji, Nakeba.” Lesa emupeshe, konse konse. “Abwa bubeji, Nakeba.”

²⁴³ Taata Wetu Wamwiulu, Ne musanchila Anweba, Pa katampe ne Lesa Wazhila, ku buwame Bwenu bonse ne lusa ku baana babalume ne babakazhi ba bantu. Kabiji twavuluka mba tuji mu kimye kya kumpelo, kafwako yakonsha kutwajijila kuya palutwe ne. Atweba tubena kupembelatu mukimye kyakukongola; byonka byokyajinga mumoba akwa Nowa, akwa kukoka muchima wakwa Lesa, kimye bwato kyo bebufikilenga, amo myeo eiti po yapulukile. Mwaambile mba, “Nanchi byobyo kikekala ne pakwiya kwa Mwaana muntu. Lesa ke kukoka muchima, kechi ukeba nangwa umo mba onaike ne, poso bonse bafwainwa kwiya na kulapila.”

²⁴⁴ Kabiji buleelo mu kino kishimikwa, muji banabalume ne banabakazhi basuntula maboko abo, bansongwalume ne bansongwakazhi, banyike ne bakulumpe, basuntula maboko abo, ne kwamba mba, “Kujipo Kintu kimo kyo ubena kundosa amiwa.” Anweba Lesa, kechi mwi Kileke ne. Lekai bapoteshe kufunda kwabo, lekai bapotesha bintu byonse byo baji nabyo. Nobe muntu ao watanwa nakikatampe kyabyobya; ke kyajinga kyalumbuluka, ke kikatampe kyatanwa, ke kintu kikatampe, kabiji aye wapoteshe byonse bichechetu byobyajinga nabyo, amba aye wakonsha kupotesha byawama, kikatampe kyabyobyo. Bapotesenga bintu byonse byo baji nabyo bya muntanda, lukeelo luno, kuyukanyikwa kwabo konse kwa ntanda.

²⁴⁵ Abo banabakazhi baikala muno, Nkambo, bavula ba mwiabo baumvwine Mamboawama basapwila bimye byavula, kabiji poso kyaikajikilwe monka muntanda, kabiji mafashonyi nobe amutanda kabiji nekutwalwa nobe byamuntanda, kabiji ne kuya mumabumba ne bintu bya muntanda, kutolamo lubanji lwabyamuntanda ne kwingijila ponka nobe bya ntanda, kabiji ne kwingijisha bintu bya muntanda. Anweba Lesa, lekai be kyumvwe bumvu, lukeelo luno. Inge mujipo luketekelo mwi abo, Nkambo, kifumyaimo leelo. Lekai kikye kikale awala.

²⁴⁶ Kabiji baabo banabalume muno, Nkambo, Anweba Lesa, bobilai lusa abo. Bavula ba mwiabo kasa babena kwenda mu bintu bya muntanda, na kukeba ne kumvwa bulongo bintu bya muntanda, bubi, kupepa, kutoma, maalwa, maalwa acheche ku lubaji lumo, nangwa—nangwa kintu kimo kiji byobya, nangwatu yakonsha kwikala kyalunkumwa, kabiji ne kukobekwa kapinapu kicheche, kyavwala-kyatama banyike bansongwakazhi. Kabiji aya mibiji yo babena kutala pa

mukwakwa, kabiji abo bajinga pepi nakunyema nabantu ne kutala kwi abo, ne kwita abobene amba bena Kilishitu.

Kabiji yukai mba awa musango wa mubiji wa yewa mwanamukazhi, kampe mu ma awala tweti-foolo, akekala na kubola mu kilende, boya ne masengo abena kulengwa kupita monka muyewa musango ne kumweka bukiye kya mubiji wanji; kabiji mweo wanji wafuma mu ngehena yakwa diabola, namambo amashinda oa ikejilemo. Kabiji, nangwabyonkabyo, aye walamachile kwi aye muchechetu, wapenta mivumbo yanji, kabiji kyajinga kyabyakusekesha kwi aye.

²⁴⁷ Lesa, bobilaiko lusa bantu. Anweba Nkambo, kechi mwibaleke balubilamo ne. Nasashijila ngubilai lusa kabiji ne kutuma lusa. Panai ku umo umo, Nkambo. Anweba yenu Yenka wakonsha kupana ao mapesho. Kabiji inge Anweba mwibitela ku Bumi Bwapeenape, lekai michima yabo ishinkuke; kabiji bataile byonsetu bintu kulubaji lungi aluno lukeelo, kabiji nanchi batambwile kyokya. Kiswishai kye, Taata.

²⁴⁸ Kabiji pano lekai Mupashi Wazhila eye mu ino mbung'eno, nabakolwa ne bamanyikwa, kabiji ne kuleka bantu bamone iye Mbila yasapwilwa lukeelo luno, amba Kwiya kabiji ne bintu byonse biji kumpelo, kabiji ne Yesu naye wingijila mu Kipwilo Kyanji. Lekai kifikizhiwe ponka pano, Nkambo, amba Anweba musakusenda babo bantu mu maboko Enu. Kabiji inge bamona Mupashi Wazhila kasa abena kwingila, mukachi ka bantu, lekai kikale kyashiniikishiwa, Mbila yo Nasapwila, amba tuji mu kimye kya kumpelo. Kabiji lekai baumvwe. Bauvwine, kabiji bakonsheshe kwikutuluka amba amba iye Yesu, jishinda Aye jo ekyubijilemo mu juba Janji, Aye uji kuno na kwikyuba kupichila mu Kipwilo Kyanji mu juba japelako. Kabiji pano lekai bekyube, na kupana bumi bwabo ne mibiji, ne myeo ne mipashi, kwi Aye. Nebapana kwi Anweba, Nkambo, mu Jizhina ja Yesu.

²⁴⁹ Pano, mu kishimikwa amo bantu mo baji, Najikutuma Billy lukeelo luno na kupana bitupa bya milombelo. Aye. . . [Kafwapo bijipo pa tepu ne—Waku.]

²⁵⁰ Anweba mwakolwa, mwakajilwa nyi? Inge Lesa usakusolola kwi amiwa, nobe byonka byo Aubile ku mwanamukazhi ku mushima, ne kumbula lukatazho lobe byo luji, nangwa kintu kimo pe obewa, kyo wayuka mba Amiwa kechi nayuka ne, kyakonsha kukulengela kwikala na lwitabilo lwa kwitabila Lesa? Bushe kyakonsha kulengela anweba bonse kwikala na lwitabilo? Bushe akye kyo kimye kyetu kitanshi kya kusambakana? [Aye nyenga waamba mba, "Ine."—Waku.] Oo, mwamona ami kasa kyangye, bino Amiwa ne mwenyi kwi obewa. Abyo ibyo nyi? Kijitu bulongo, lekai aye Nkambo Lesa akupe kukabila kobe.

²⁵¹ Bino, kyakine, nangwa ine? Oo, ami! Kwita pa bupopweshi bwenu bwa bumuntu. "Baalamu," waambile mba, "uji kwepi?"

Elaija pa Mutumba wa Kamela, waambile mba, “Uji kwepi Baalamu? Kwepi? Mu mubukai.” Obewa kechi wafwainwa kubusha Yesu ne. Aye wabuka kimye kyonse. Aye uji na bumi, myaka yonse, wakonsha kuuba; aye ujitu pamo keesha, leelo, ne myaka yonse. Amena. Lesa wikala Lesa.

²⁵² Mwaketekela mba lukatazho lobe lwa muchima lusakupwa ne kwikala bulongo nyi? Obewa kechi wafuma kuno ne. Obewa ubwela ku Lexington kabiji ukabuula bantu bintu bikatampe abyo Nkambo byo emubila anweba. Mwamona?

²⁵³ Ke kuyatu konkwa kumitwe yabantu, akya kyabujilwe kutambulwa. Kipwilo kyumi kibena kukwata kyokyo, bukiji bukiji, kabiji ne kuyuka mba Kyeenyi kya Mupashi Wazhila kiji muno.

²⁵⁴ Muntu umo kunyuma kukwe wajikusuntula kuboko kwanji. Bushe ibyo nyi, inetu? Mwaketekela mba Lesa wakonsha kumbula lukatazho lwenu nyi? Mukote. . .

²⁵⁵ Mulongo uji kumpelo, Naketekela waambile mba, kimye kicheche kyapita, amba. . .Waketekela nyi, mulongo? [Aye mulongo waamba mba, “Ee.”—Waku.] Waswa nyi? Nanchi alwa lukatazho lwakikoba lusa kwimusha, anweba musakwikala bulongo. Mwaketekela kyokyo nyi? Obewa wikiswa nobe wabukwa? Suntulai kuboko kwenu, mwayuka. Mwamona? Uu-uu. Kijitu bulongo. Aye ke mwenyi kwi amiwa. Mwayuka kyokyo, Pat.

²⁵⁶ Ke awa mwanamukazhi ubena kutala kokwa, nakulomba, ntale ami, waambile aye wajinga mwenyi. Anweba mwaketekela mba kikola kya kwenda mashi lubilo kisakubwela pe anweba nyi? Abyo ibyo, kechi ibyo nenyi? Suntulai kuboko kwenu inge abyo ibyo. Kijitu bulongo, ikalai na lwitabilo mwi Lesa.

Mwamona mo Nekitazha nyi?

²⁵⁷ Pano nga anweba bantu bamo mwajikungyuka ami? Mujipo kintu kimo pa muchima wenu. Suntulai kuboko kwenu. Neanweba bavula! Amiwa kuuba ne kyuba ne; Kyafwainwatu kwiya. Mwayukatu, ke lwitabilo lobe.

²⁵⁸ Georgie Bruce, Namumona saka aikala popa. Anweba kimye kyonse mubena kukeba kutanapo kintu kimo ku muntu umo, Georgie. Obewa wabukilwe, na kaansa. Kechi papipo jipuzho mumilanguluko yobe ne. Aja juba anweba jomwaishile kuno ku tambanako kabiji mwaendele kokwa kukibelo kyakunyuma, na Mupashi Wazhila kwiya kwi ami, kabiji nemubuujile kyubilo kimo amba kafwako nangwa umo muntanda wayukile ne kanatu anweba ne Lesa ne muntu mukwabo. Abyo ibyo nyi? Abyo ibyo. Mwaketekela nyi, kechi ibyonyi, Georgie? Muji kintu kimo pa muchima wenu, Georgie. Anweba mwaketekela mba Lesa wakonsha kumbula kiji mumuchima wenu nyi?

Wakonsha kwimulengela anweba, bantu amba bangyuke ami, mwaketela nyi?

²⁵⁹ Nayuka Georgie, bino aye ubena kulanguluka kintu kimo. Uji na bantu babiji, bafuma kukwe, aye ubena kulombelela. Bonse babiji bekala mu Corydon. Abyo ibyo. Kabiji uji na muntu kuno, muntu ubena kulombelela, uji mu kipatela kukwe. Kabiji ubena kulomba, kechi na mambo akulombelela lubuko lwanji ne, pakuuba lupulukilo lwa mweo wanji. Abyo BYOBYAAMBA AYE NKAMBO. Abyo ibyo. Abyo ibyo, Georgie? Abyo kine ibyo.

²⁶⁰ Muntu umo kunyuma kokwa wajikusuntula kuboko kwanji, kunyuma kwine, kunyuma kukwe. Anweba, pano nga anweba? Mwakonsha anweba kusutulako kuboko kobe, obewa wi mwenyi kwi amiwa? Awe mwanamulume waikala papo kasa abena kutala pe amiwa, Amiwa kechi nakuyuka ne. Bushe mwaketekela mba amiwa ne ngauzhi wa Lesa, kalume wakwa Lesa nyi? Anweba mwaketekela Mupashi Wazhila, kyo Naamba bo Bukine? Anweba mwaketekela Kyokyo nyi? [Aye mulongo waamba mba, "Ee."—Waku.] Inge wakonsha kuketekela, uji na obewa- . . . akyo kyo kyonka kintu kyo uji nakyo, mambo ubena kumanama na kaasa. Abyo ibyo. Obewa kechi wafuma mu uno muzhi ne. Obewa wafuma ku New Albany. Abyo ibyo. Kabiji obewa uji na kaasa. Inge mwakonsha kuketekela na muchima wenu yense, usa kwikalatu bulongo. Mwakonsha kwikiswa nyi? Sutulaiko kuboko kwenu. Jitotwe ja Nkambo.

²⁶¹ Amiwa naketekela, awa mwaanamukazhi uji kokwa uji nakitoka-ubena kutala pa kisocho kyazhokoloka ku mutwe wanji, waichiluluka mwanamukazhi, imikako kubok kobe. Amiwa kechi nakikalapo na muntu wachiluluka ne. Anweba mwaketekela nyi, mwanamukazhi nyi? Kijitu bulongo, mwane, ketekelai na muchima wenu yense. Anweba muji na lukatazho lwa muchima, lukatazho lwa munda, byalubakana. Muntu umo wimuletele kuno lukeelo luno. ABYO BYOBYAAMBA AYE NKAMBO. Abyo ibyo, kechi ibyo nenyi, inetu? Inge abyoyi, nsonkonaiko aka katambala kamilombelo ko ujinako mumaboko obe, nanchi bantu bamona. Amiwa kechi na kimumonapo awe mwanamukazhi mu bumi bwami ne.

²⁶² Bushe anweba mwaji kusuntula kuboko kwenu nyi? Bushe Amiwa ne mwenyi kwi anweba nyi? Kabiji ne anweba mwibenyi kwi amiwa. Anweba mwaketekela mba Lesa wanguyuka amiwa, nangwa anweba Lesa wimuyuka nyi? Anweba mwaketekela mba Aye wakonsha kumbula kiji mu muchima wenu nyi? Anweba mubena kulombelela muntu umo. Ke bashobe, uji na lukatazho lwa muchima. Abyo ibyo. Kabiji anweba mubena kukeba lubatizhilo lwa Mupashi Wazhila. ABYO BYOBYAAMBA AYE NKAMBO.

Inge anweba mwakonsha kuketekela!

²⁶³ Bushe ngaawa nsongwakazhi mucheche uji nakuboko kwanji kuji nobe *bibye*, anweba mwaketekela nyi? Lukazho lwenu ke abya byatumba pa kuboko. Bino anweba mubena kulombelela awa mukana wenu. Abyo ibyo. Awa mwaana kechi ujitu bulongo ne. Akyo kyakine. Bushe kechi ibyo nenyi, mwanamukazhi nyi? Anweba mwaketekela na muchima wenu yense nyi, pa kikyee.

Byo Amiwa naambile mba, “mwaana.” Pembelelaiko mineti umo. Oo, abyo byokiji. Mwanobe wajinga na mapuso a motoka; kilema. Amiwa kechi na kuyuka obewa ne, mwanamukazhi, bino akyo kyakine. Inge abyo ibyo, sutula kuboko kobe.

²⁶⁴ Pano, Ing’anyi uji muno? Awe ye Ng’anyi? Kechi ke amiwa ne. Nakonsha kuuba Amiwa byepi kyokyo? Kechi mukwachilwe na Mupashi ne, Bintu bya bumupashi. Ke aye Lesa muno! Awa Mupashi Wazhila ye mubena kukeba anweba, bushe anweba Mwikiketekela nyi pano? Bushe mwikiketekela Pano nyi? Kijitu bulongo, nanchi pano Wamutambula. Pano kino kyo kimye kya Kwikitambula. Ketekelaitu na muchima wenu yense.

²⁶⁵ Anweba mwakolwa nangwa mwakajilwa kimo. Amiwa kechi mbuka ne. Kafwako muntu wakonsha kubuka ne. Amiwa kechi nakonsha kupana Mupashi Wazhila ne. Bino Umo wakonsha kubuka ne kupana Mupashi Wazhila, Aye uji pano. Aye Iye Wikyuba.

²⁶⁶ Pano kunyikai mitwe yenu. Anweba mwaketekela ponka pano, byo Mbena kwimulombelela ne tutwe tutambala.

²⁶⁷ Taata Wetu Wamwiulu, monka mo Nayukila, Amiwa napita pa bonse benyi, nobe byonka Amiwa mwine byonauvwinenga kukoka kabiji ne kupelelwa mukufumamo; nauwvine kutangijilwa mba akye kyokimye kampe kyamweka kuboba Basalululwa. Lekai umo umo wa mwiabo, Nkambo, ao waitwa kabiji baichilwe kutelwa ku Mupashi Wenu; kintu kimo, ke lwitabilo lwabo, bajinga na lwitabilo lwabaya (bamo mwi abo) kukila byo balangulukilenga mba baji nabyo. Batatwilekotu mu michima yabo.

²⁶⁸ Kabiji awa mwanamukazhi wakwachile ku kyakuvwala Kyanji kimye kimo akyo Aye kyoapichilepo kokwa, kabiji Aye waalulukile ne kwaamba mba, “Ng’anyi wajikukwata Amiwa?”

Kabiji abo baambile mba, “Kyawama, muntu yense wakwimukwata Anweba.”

²⁶⁹ Aye waambile mba, “Bino Naumvwa nobe Amiwa nakooka.” Kabiji Aye wataine awa mwanamukazhi wamucheche kabiji wamubuujiile mba uji na lukatazho lwa mashi, kabiji lwitabilo lwanji lwamu bukilwe aye.

²⁷⁰ Kabiji Baibolo waamba, mba, “Aye ukijitu Ng’anga Mukatampe, ne leelo, ao wakonsha kukwatwa kubya kukabila byetu.” Akyo Kinembelo kyaamba mba, “Aye ujitu pamo

keesha, leelo, ne myaka yonse.” Kabiji inge Aye ye umotu, kabiji ye Ng’anga Mukatampe, Aye ukoba bintu bimo kabiji ne kuuba kintu kimo.

²⁷¹ Kabiji lekai bantu bamone mba Kipwilo kyayulwamo-Mupashi kibena kwiya ku mutwe. Kilishitu ubena kukeba kwiya na kusenda Kipwilo Kyanji. Biyukilo byanji byabaya bikatampe, nobe byo kyajinga mu moba a Sodoma; Ao waambile, wayukile Sala, kabiji wayukile mba wajinga na mukazhi watelwa nabhina amba Sala, wayukile mba aye mutente wasekele; Aye waambile mba, “Akye kikekala ke kiyukilo. Umvwe mwamona kyokya, vulukai, akya kisemi kechi kikapite ne poso byonse bikafikizhiwe.” Kiji bino. Atweba tuji kupelo.

²⁷² Kiswishai, Nkambo, amba yense muntu wakolwa muno wakonsha kuyuka mba Yesu Kilishitu mumi uji muno. Lekai atwe tutambala twikale twapeshiwa kumubiji yense kutukaya nakyu. Amiwa nabhachisha bandemona, babantu. Namutapanga ye, na Mupashi wakwa Lesa, mu lwitabilo, Amiwa namupanga kuzhinauka kuji konse. Lekai muntu yense uji muno, ao waikajikilwe ku Mumi bwa Penape, atambule Akino mu uno awaala. Lekai akya kyonsetu kyakila, kyonse kicheche kifumemo, kyonse kintu kicheche kyamutanda, kyonse kinemenezhi kicheche, nobe yonka byaamba Baibolo, “Twayai tushe kinemenezhi kyonse, ne abwa bundengamambo bupelawizha kwitutwala atweba mungi; pakuuba mba tunyame, na butekanye, kikokwanyu kyabikwa kulutwe yetu; kasa tutala” (kuka? ku kipwilo? ku kabungwe?) “ku Nsulo ne mwine Upwisha wa lwitabilo lwetu,” ao uji muno pakino kimye, “Yesu Kilishitu, Mwaana wakwa Lesa.” Aye ubena kutala kwi Aye Ao... Atweba kechi twafwainwa kusenda byambo byo twayuka mba akya kyakine ne, bino mukyonkakya mubino Byambo byalengelwe ke bintuntulu kwi atweba lukeelo luno. Awa yeka umo Yesu wafwile, kechi wafwa ne, Aye wasangukile jibiji, kabiji myaka masauzande abiji kulutwe Aye ubena kuleta Kipwilo Kyanji ku mutwe. Aye mupashi wakwa Yudasa ubena kwingila mukachi kabo. Bino lekai abya byonsetu biji kulubanyi lwabyakwitentulamo kabiji nebyonsetu, awe awaala, kabiji watambwilwe Aye.

²⁷³ Lekai abo beyumvwe, byo baji nabyo, kupichila mu busapwishi. Lekai abo batuluke pano amba Byambo byonsetu abyo byobauvwa byalengwa byasololwa kwi abo, kabiji abo kekiyukile Akya, amba Ke Kilishitu. Kabiji lekai pano bekyube, kubila pa Kiky: Kitambule, ne kwimana ku maulu abo, na kupana lushimuno; kabiji ne kuya mu Bufumu bwa Lesa, monka mu kuyuzhiwa na Mupashi Wazhila.

²⁷⁴ Lekai bakolwa babukwe. Lekai bamanama babukwe. Lekai kukabila kwa muchima yense kwikale bulongo. Kiswishai kye, Lesa Wabulume bonse.

²⁷⁵ Pano na mitwe yenu yakunama, michima yenu ishinkulwe, anweba ipanai anweba bene na bene mu kimye kya milombelo; kasa tukyangye, Amiwa naketekela, awa mutanchi wa lubatizhilo lwa mu meema lubena kwiya, bibye. Kukekala kupwila kukwabo bufuku buno.

²⁷⁶ Bino, vulukai, kechi muleke kikye kimye kyajishuko kipite ne. Amiwa naikala kuno pano ma awala abiji na afu, nangwa kukilapo, na kweseka kusenda kimye kyami, kabiji ne kuleta Mamboawama, kabiji ne kwikibika Akya kyonka kyalumbuluka. Nanchi atweba twaiya monka mujibulongo ne kumpelo. Kabiji kyalondelapo: kuvwa, kutuluka, ne kwingijila pa kyonkakya. Kechi muleke kifume mu mutwe wenu ne. Anweba mwi Kyumvwa. Anweba mwayuka mba Kyeenyi Kyanji kiji muno nyi? Bushe mwayuka mba Aye Iye ubena kwimwita nyi? Pano ke ekyube Kye. Lesa ekale ne anweba. Ikalai na kimye kya milombelo.

²⁷⁷ Mulongo Neville, iyai, pacheche, mu milombelo, inge anweba mwakonsha kwiya kuno.

Mukwachijilaitu aye yenka. 

60-0221 Kumvwa, Kutuluka,
Nekwingijila Ponka Pa Kyambo Kya Lesa
Branham Tabernacle
Jeffersonville, Indiana U.S.A.

KAONDE

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaana, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org